


NZAMBE ABONGOLAKA

NDE MAKANISI NA YE NA

NTINA NA LILOBA NA YE?

 Tógumba mitó. Molingami Nkolo Yesu, tosangani lisusu na Nkombo na Yo, kozeláká ná mitema lúkú-luku ete Nguya na Nzambe, oyo epesaka bomoi, ésošana mpo na komema biso na koyeba esika na biso, mpe mikumba na biso, lokola libota oyo ebengami, ekabwani na mokili mpe ebulisami mpo na Nzambe. Na mpokwa oyo, Nkolo, sala ete mapamboli ya Nzambe ékamba biso mpe étambwisa biso na makambo tokosala to tokoloba, mpo ékoka kopesa lokumu mpe nkembo na Nkombo na Yo. Amen.

² Nazali na esengo ya koya lisusu na losambo na mpokwa oyo mpo na kozala elongo na bino balingami. Nayebi ete molunge ezali, kasi nauti kobenga mwasi na ngai, nakanisi ete kuna, molunge ekómi na degré ntuku misato na mibale, ntuku misato na mitano to ntuku misato na motoba, to eloko ya ndenge wana, molunge ezali makasi mingi koleka awa. Boye, nabandi komesana na molunge sikawa. Boye, kasi nazali na esengo mingi ya kozala awa na tabernacle, na eleko kitoko ya Pasika oyo.

³ Mpe nakoki koloba te ete nakosenga bolimbisi mpo na Liteya molai, molai ya ntongo ya lelo, kasi na . . .Ezalaki, nalingaki te ko—kolembisa motema molai na bino, mpe nálembisa yango lisusu na mpokwa oyo. Kasi na—nalingaki ko—kopesa bino Nsango yango, ete bozali eteni moko kati na lisekwa yango. Bomoni? Mpe bómitungisa lisusu te mpo na Yango, bomoni. Bósepela na Yango! Eloko moko te, na esika moko te, ekoki kokabola bino na Yango; eloko moko te; bobátelami Libela kati na Bokonzi na Nzambe. Soki Nzambe atii yo Elembo na Ye, ozali bongo kino na nsuka ya esika okosukela

⁴ Soki gouvernement etii elembo na liboke moko, soki kompani ya engunduka etii elembo na ekuke moko, wagon wana ekoki kosimbama te kino ekóma na esúkeli na yango.

Soki Nzambe atii Elembo na Ye likoló na moto, mpe Elembo yango ezali Molimo Mosanto, soki Atii moto elembo ndenge wana, moto yango akokende kino na esúkeli na ye ya Libela. Akoki lisusu ata moke te, ata moke, kozonga nsima. Mpamba te bómikanisela, Baefese 4:30 elobi: “Bóyokisa Molimo Mosanto na Nzambe mawa te, na nzela na yango, botiami elembo mpo na ntango nyonso.” Bomoni, otiami elembo mpo na libela. Molimo

Mosanto atii yo elembo, mpo na Seko, kati na Bokonzi na Nzambe. Sikawa bókanisa naino!

⁵ Na nsima, zabolo akobeta yo, akoyebisa yo makambo ya ndenge na ndenge, akofunda yo, mpe—mpe akoluka kosala ete ókanisa ete otiami elembo te. Kasi koyoka ye te.

⁶ Sikawa, oyebi ete osili kolongwa na kufa mpo koingela na Bomoi. Oyebi makambo ozaláká kolinga kala, olingi yango lisusu te. Oyebi ete ondimi Liloba ya Nzambe moko na moko. Omonaka Nzambe kosala katikati na biso, kozanga. . . Azali kotalisa polele ete Azali “NAZALI” monene. Omonaka ete nyonso oyo mpenza elobamaka na Nkombo na Ye, ata likambo moko te esilá kosakolama na Nkombo na Ye kozanga ete ékokisama mpenza ndenge esakolamaki. Ata science, bazulunále, bafotó, ba-camera, bakomi, mpe nyonso mosusu, basengeli koyeba yango. Bomoni, bálinga bálinga te, Nzambe nde asalaka ete báyeba yango, ata bongo, bomoni, mpo yango éyebana.

⁷ Sikawa, ezali etonga moke. Bóbosana te, Akoya mpo na kozua etonga moko ya monene te. “Kobanga te, etonga moke; Tata na bino asepei. . .” Bomoni?

⁸ Nalingi koyebisa bino likambo moko, ekokamwisa bino mpenza, liboso tóbulisa motei moko na mosala. Ezali likambo moko ya kokamwa mpenza, kasi ezali kaka mpo boyeba yango. Sikawa, nalobi te ete ezali mpenza motángó yango, kasi nakolinga koyebisa bino yango.

⁹ Nayebi te soki moto moko awa asilá komona ndenge basangisaka bibwele. Kútu, nandimaka yango te, kasi natalaki yango kosalema. Namonaki bango kozua mai ya oyo ya mobali, moke mpenza, oyo ekokaki kokangama na mwa libende moko, lokola mwa cure-dent, mpe kotia yango likoló na eteni moko ya libanga ya marbre. Mpe batalaki yango na loupe oyo ekómisaka yango monene, nayebi te mbala boni, na lolenge ete mai yango ya mobali. . . Na esika oyo okoki komona eloko moko te na miso ya mosuni, na talatala mosusu nyonso. Kasi ntango eyeisami monene mbala mokama to mokama na ntuku mitano, okoki komona, na kati ya mwa litangá moko wana, ya mai ya mobali, ntango mosusu mwa mimboto ntuku mitano to mokama ezali kopumbwa-pumbwa. Lisusu, oyo ya mwasi ezalaka na motángó moko wana ya máki, na—na kati mai ya mobali. Sikawa, na ntango ba—batii yango esika moko, mibale ya liboso oyo ekokutana mpe ekosangana. . .

¹⁰ Bobele moko kati na milió mobimba wana nde ekotikala na bomoi. Bosilá kokanisa yango? Ezali momboto yango moko, mpe líki yango moko, yango mibale ndenge moko, kasi bobele moko nde ekotikala na bomoi. Mpe etálelaka te oyo wapi ekómi wana liboso. Mpamba te, mbala mosusu líki ezali na nsuka mpenza, mpe momboto ekoki kozala na katikati ya mai ya mobali, mpe

bakomatelana likoló bamoko na bamosusu. Esengaka Mayele moko boye mpo na koyeba soki akozala mwana mobali to mwana mwasi, akozala na suki ya motane, ya moindo, to soko nini. Ezali boponami ya Nzambe. Ekoki kozala eloko mosusu te. Boponami!

¹¹ Ata na mbotama na mokili oyo, ezalaka boponami, mpo na koyeba soki ekozala mwana mobali to mwana mwasi, to nyonso oyo yango ekozala. Mpe ntango mwa momboto wana emibendi mpe ekoti na kati ya líki oyo, mpe mwa mokíla na yango elongwe, ebandi kosala mokuwa ya mokongo ya bebé yango, kokokana na lolenge na yango; nyama, bebé, to soko nini yango ezali. Mpe mimboto nyonso oyo etikali kati na milió yango. . . Máki milió, mimboto milió, kasi kaka moko nde etikali na bomoi. Nyonso ezali ndenge moko, kasi Nzambe nde aponaka, na boponami, oyo ekotikala na bomoi, mpe nyonso oyo etikali ekokufa. Moko kati na milió!

¹² Ntango Yisraele babimaki na Ezipito, bango nyonso bandimaki nsango ya mosakoli bobele moko. Bamonaki bilembo ya Nzambe, na nzela na Mose. Bango nyonso bamonaki yango. Mpe bango nyonso babimaki na Ezipito, bakatisaki Mbu Motane, mpe babatisamaki na Mose. Bango nyonso bamonaki nguya na Nzambe kosimba ye, ntango ayembaki na Molimo; mpe ntango Miriam azalaki kobeta tambourin mpe kopotapota mbangu na libongo. Moko na moko na bango, mpokwa nyonso, azalaki kolia mána ya sika, ya likoló, kouta na lola. Moko na moko na bango amelaki mai oyo ebimaki na Libanga na molimo libetamaki. Mpe bato milió mibale nde balongwaki na Ezipito. Bato boni bakómaki na mboka ya elaka? Mibale. Moko kati na milió! Bango nyonso bazali wapi? Yesu alobaki ete bakufaki. “Batata na bino baliaki mána na lisobe, mibu ntuku misato, kasi Nalobi na bino ete bango nyonso basili kokufa.”

¹³ Sikawa Baklisto bazali pene na milio nkama mitano na mokili na mpokwa oyo, kotanga ba-Katoliko, ba-Protestant, ná bamosusu. Soki Yesu asengeli koya Konetola bato, kokokana na oyo nauti koloba, bato nkama mitano bakozanga na mokili na mpokwa oyo, kokenda na Konetolama. Mpe ntango mosusu ezalaka motángó yango, soki totángi bikólo nyonso, oyo bamonanaka lisusu te. Boye, ekoki kosalema ata na ntango nini, bomoni.

¹⁴ Oh, Baklisto, tólata bibundeli ya Nzambe. Tósala nyonso oyo tokoki kosala, mpo na kosalela Ye, tólinga Ye, mpe tózela ngonga ya nkembo wana.

¹⁵ Sikawa, ba-milió mpe ba-kiasa ya bato te nde bakouta na ekeke moko mpo na kokota kuna na lífílí. Ekoki—ekoki kosalema te.

Sikawa, bóbosana te, mokolo na mokolo ekeke moko esilaka, mokolo na mokolo. “Ndenge ezalaki na mikolo ya Noa, ekozala mpe bongo na boyei ya Mwana na moto, epai wapi

milimo mwambe ebikisamaki na mai.” Kasi mokolo na mokolo esukisaka eleko ya mibu ntuku minei mpo na moto moko, mpo na bayike. Bomoni? Mpe mokolo na mokolo, ebele mingi batiamaka elembo kati na Bokonzi. Mokolo moko, mokolo ya nsuka yango ekokóma.

Tika ete tóndimisama nde sikawa, wana tozali na makanisi na biso malamú. Na losambo, mpe katikati na bato, wana Molimo Mosanto azali komitalisa Ye moko elongo ná biso, tóndimisama ete nyonso ezali malamú, mpe eumeli kozala malamú, liboso na Ye.

¹⁶ Bótelema te. Bópema te, butu mói, kino ntango Nguya wana epesaka bomoi élongola bino na makambo ya mokili, mpo na kokotisa bino na Bokonzi na Nzambe. Mpe bino baoyo bokótisami mpenza na Bokonzi na Nzambe mpe Molimo ya Nzambe epesi bino bomoi, oyo esengo mpenza! Ná mpisoli ya esengo, tosengelaki kozala na mabolongo na biso, butu moi, kotondáká Nzambe mpo na oyo Asali.

¹⁷ Na mpokwa oyo, tozali na mwa mbongwana na liyangani. Tozali na ndeko moko malamú awa, Ndeko Capps. Ayei epai na biso, auti na lingomba ya ba-Nazaréen. Nakanisi ezali bongo, Ndeko Capps? Azali na mposa ete tóbulisa ye na mosala na mpokwa oyo, na kotieláká ye maboko.

¹⁸ Tozali na mikanda ya kopesa na moto moko te, atako toyebani lokola . . . Tokokaki kozala na mikanda, kasi tondimaka ete motei ya solo, oyo abulisami, mikanda na ye ezali na Lola. Bomoni? Mpe a—azali na makoki ya koteya Biblia na ntango nyonso oyo Nzambe azali kotalisa bomoi na ye na nzela na Biblia. Tondimaka ete yango nde etalisaka oyo ye azali.

¹⁹ Mpe, sikawa, Ndeko Capps asílá kobulisama liboso na bato na li—lingomba ya ba-Nazaréen, kasi na mpokwa oyo alingi ete bampaka, mpe bongo na bongo, bátiela ye maboko mpo na kobulisa ye, mpo na komema Nsango oyo. Oyo mpenza likambo ya lokumu!

²⁰ Na—nasili koyoka makambo banda nakómaki na Tucson, mpe makambo ya malamú mingi, ya Ndeko Capps, awa, ndenge azali kosunga Ndeko na biso ya malamú mingi, Neville, oyo asimbi bendele ya Pole na mpiko nyonso, na ndenge nyonso oyo bango mibale bakoki kosala. Tosilá kotiela Ndeko Neville maboko, kasi Ndeko Capps te. Mpe nalingi ete baoyo bazali batei, Ndeko Jackson ná bamosusu, soki bazali awa, mpe Ndeko Ruddell ná bampaka ya losambo oyo, soki bakolinga koya awa mpo na miníti moke mpenza sikawa, mpe kotiela Ndeko Capps maboko. Mpe . . .

²¹ Sikawa tomoni, na Biblia, ete wana nde lolenge oyo bazalaki kosala yango, bazalaki kotiela bango maboko mpe bazalaki kotia bango pembeni. Wana nde lolenge basalaki mpo na Timote. Balobaki: “Na likabo oyo ezalaki kati na yo, kouta na nkóko

mwasi Lois. . .” Basilaki komona yango, ete likabo moko ezalaki kati na mobali yango, eyaki epai na ye na nzela na bampaka, na kotieláká ye maboko.

²² Sikawa, bandeko ya mikolo ya nsuka, bandeko ya mbula ya mikolo ya nsuka, bango, babulunganisi yango. Bakanisaki ete bango nde bapesaki ye likabo, na kosaláká bongo. Te, likabo esilaki kozala kati na ye, bango batielaki ye bobele maboko mpo na kotalisa ete bandimi ete Nzambe asilaki kotia likabo yango kati na ye. Mpe batalisaki yango, na kotieláká ye maboko.

²³ Mpe bato oyo bazali awa na losambo oyo, oyo, nandimi ete, na kati ya elimo na bango, bazali na Nguya oyo epesaka bomoi; soki bino bandeko, bokoki koya sikawa, Ndeko Ruddell ná bino nyonso oyo bozali awa na losambo, ná bampaka ná ba-losambo na biso ya zinga-zinga, mpo tótiela Ndeko Capps maboko, mpo ákoka kobulisama wana tondimi ye, liboso na eyanganelo oyo, mpe kotindama mpo na koteya Nsango-malamu ya Nkolo Yesu, na bisika nyonso oyo Nzambe akoki kobenga ye. Akómi. . .

Asílá kokóma moko na biso, na nzela na Mbotama. Azali moko na biso mpo andimeli Nsango oyo. Azali moko na biso mpo—mpo azuaka ngámbo ya Solo ya Liloba. Mpe tolingi ete Ndeko Capps ábulisama na miso ya bato, liboso na bino, na kotieláká ye maboko, mpo na kotalisa ete azali moko na biso.

Malamu, Ndeko Ruddell, Ndeko Capps, Ndeko Neville. Ndeko Junior Jackson, batei mosusu nyonso oyo bazali awa, nayebi te soki bazali boni. Nayebi te. . .Nabanzi bazali na mayangani na bango moko na mpokwa oyo. Boye, yaka awa, Ndeko Capps.

Sikawa wapi Ndeko Hunter ná baoyo bauti na New York, ngai. . .Ndeko Anthony? Nabanzi bazongi. [Ndeko Neville alobi: “Ndeko Anthony ye wana kuna na nsuka.”—Mok.]

Bamosusu kati na bino baoyo bozali awa, oyo bazalaka elongo na biso, ee, tokosepela ete bóya kotelema awa elongo na biso sikawa, mpo na kotalisa ete tondimi ete Ndeko Capps azali. . .

Bato boni kati na bino awa bayebi Ndeko Capps? Bótombola maboko. Malamu, bókitisa maboko. Bato boni bandimi ete azali mosali na Nzambe? Bótombola maboko. Tolingi ye, lokola ndeko na biso.

²⁴ Sikawa oyo ezali mpenza lolenge oyo esengeli te, na oyo tokoki kobenga kobulisama na mosala, kasi nalingi ete eyanganelo oyo, nakokaki koyemba loyembo yango te, kasi nalingi ete bósunga ngai námeke yango.

²⁵ Mokolo moko mosakoli moko akendeki na etumbelo, na kati ya tempelo. Mpe wana azalaki kuna na tempelo. . . Azalaki moto malamau, kasi azalaki bobele koyékama na maboko ya Uzia mokonzi, mpe azalaki—azalaki moto malamau. Kasi,

mokolo moko, na tempelo, amonaki eloko moko, ntango azuaki emononeli moko, oyo atikálá komona te liboso. Amonaki Banje, ná mapapu, bazalaki kopumbwa ngámbo na ngámbo, na kati ya ndakonzambe, kogangáká: “Santu, santu, santu, Nkolo Nzambe na Nguya-nyonso!” (Yaka, ndeko. Iyo. Bomoni?) “Santu, santu, santu, Nkolo Nzambe na Nguya-nyonso!” (Ben.)

²⁶ Ntango asalaki bongo, makonzi ya tempelo eninganaki. Mpe alobaki: “Mawa na ngai! Mpo nazali moto na bibebu ya mbindo.” Liboso na Nzambe, asósolaki ete atako azalaki mosakoli, azalaki na libunga. Alobaki: “Nazali moto na bibebu ya mbindo, mpe nafandi elongo na bato na bibebu ya mbindo.”

²⁷ Mpe moko na Banje yango apumbwaki, azuaki likála ya Móto mpe amamaki bibebu na ye, mpe alobaki: “Sakola, mwana na moto!”

Okoki kotindela biso loyembo yango, ndeko mwasi, soki olingi. Bato boni bayebi loyembo yango? Tóyemba eteni moko. Malamu.

Ntango likála ya Móto emamaki mosakoli,
 Ekómisaki ye peto mpenza,
 Ntango Mongongo na Nzambe elobaki:
 “Nakotinda nani?”
 Na bongo ayanolaki: “Ngai oyo, tinda ngai.”
 [Maloba mazangi na bande—Mok.] . . .lobá,
 Nkolo na ngai,
 Loba, mpe nakoyanola Yo noki;
 Loba, Nkolo na ngai, lobá, Nkolo na ngai,
 Loba, mpe nakoyanola: “Nkolo, tinda ngai.”
 Bamilió ya bato bazali kokufa sikawa kati na
 masumu mpe nsoni,
 Yoka kolela na bango ya mawa mpe ya mpasi
 mingi;
 Kende mbangu, ndeko mobali, kende mbangu
 kosunga bango;
 Nokinoki yanola: “Molakisi, ngai oyo.”
 Loba, Nkolo na ngai, lobá, Nkolo na ngai,
 Loba, mpe nakoyanola Yo noki;
 Loba, Nkolo na ngai, loba, Nkolo na ngai,
 Loba, mpe nakoyanola: “Nkolo, tinda ngai.”

Bampaka bakoki kopusana awa sikawa mpo na kotiela Ndeko Capps maboko. Bisó nyonso tógumba mitó.

²⁸ Nzambe molingami, makonzi ya tempelo eningani lisusu, mpe, wana tozali komona Molimo oyo epesaka Bomoí kosala kati na ndeko na biso. Nabondeli, e Nzambe, wana azali komiyoka eloko oyo, kouta na Likoló, ezali koloba na ye ete asengeli kokende. Totieli ye maboko, lokola bampaka na Yo, Nkolo, mpe topesi ye mbote ya bondeko na loboko ya mobali; totieli

ye maboko, mpo na kolekisa mapamboli ya Nzambe likoló na ye, mpo Ópakola bibebu na ye, makanisi na ye, bomoto na ye mobimba. Mpe tika ete ámema Nsango ya Evangile oyo na bisika nyonso bibombani-bombani oyo Okobenga ye. Sala yango, Nkolo. Topesi Yo ndeko na biso, lokola mosali na Yo, na Nkombo na Yesu Klisto. Amen.

²⁹ “Teya Liloba,” elenge ndeko na ngai. “Ézala na ntango malamú, mpe na ntango malamú te; pekisa, pámela, na motema molai mpenza mpe na Mateyo.” Nzambe ápambola yo, ndeko.

³⁰ [Ndeko Ben Bryant alobi: “Ndeko Branham, okolinga kotielá ngai maboko? Bakolinga kotielá ngai maboko? Nasepeli kobulisama na mosala.”—Mok.] Osílá...? Nayebaki te ete obulisámá naino te.

Ndeko Ben, oyo, asílá koya epai na biso. Nakanisi ete ekokisi mwa ntango banda abandi koteya. Kasi, liboso na bato, (ngai nazalaki kokanisa ete asílá kobulisama; yango wana nabengaki ye ete áya na etumbelo.) naino abulisámá te, to toliélá ye naino maboko awa te.

³¹ Sikawa, mwasi ya Ndeko Ben azali awa na esika moko boye, mpe azali moto ya motuya. Azalaki mwasi motei. Mpe ntango ye ná ndeko na biso ya mobali babálanaki, amemaki mwasi na ye na tabernacle, ntango amonaki mpe ayokaki Liloba, ata azalaki elenge mwasi moko malamú mpe azalaki na bomoto ya malamú, kasi ntango amonaki ete ezali mabe ete basi básala mosala yango, atiaki yango pembeni; mpe emonanaki lokola ekitaki likoló na mobali na ye. Ezali malamú. Elóngobani na bantoma. Esengelaki nde kozala bongo.

³² Ndeko Ben amemaka ba-bande, ndenge nasósoli, elongo ná mwasi na ye. Bakendeke na bisik-... libanda kuna mosika, na kati ya bangomba mpenza, na kati ya bazámbe, mpe bayokisaka ba-bande yango mpe balobelaka na ntina na ba-bande yango. Mbala mingi bayambamaka te, babenganaka bango, babwakamaka libanda. Toyebaka ete ekozala bongo. “Mpamba te baoyo nyonso babíkaka na bosantu kati na Klisto Yesu bakonyókwama.”

³³ Bato boni awa bayebi Ndeko Ben? Bato boni bandimi ete azali mosali na Nzambe, oyo abongi na lipamboli oyo tokosenga na Nzambe mpo na ye? Bomoni, azali mopaya te. Azali elongo na biso mibu na mibu. Ngai nayebi ye lokola moto na komikitisa. Azali lokola ngai; asalaka mabunga ebele. Bisó nyonso tosalaka yango. Oyo nasepelaka na yango na ntina na Ndeko Ben ezali ete, akoki ata konguluma na mabolongó mpo na kobongisa likambo yango.

Mpe, mokolo wana, ntango ayokaki liteya ya *Libala Mpe Koboma Libala*, ye ná mwasi na ye balingaki kokabwana, mpo alingaka mwasi na ye, mpe mwasi alingaka mobali na ye, kasi balingaka kolóngobana na Liloba na Nzambe. Nyonso

oyo Liloba elobi, yango nde balingaki. Nabondeli ete Nzambe ápambola Ben ná mwasi na ye, na mosala na Ye.

Tótiela ndeko na biso ya mobali maboko.

³⁴ Nzambe molingami, totieli Ndeko na biso Ben maboko, lokola elembo ete tolingi ye. Mpe tondimi, Nkolo, ete azali na mposa ya kosala mosala moko mpo na Yo, ya kotindama ná bandede oyo, mpo na koyokisa yango epai ya bato ya bangomba na bamboka ya mosika, epai oyo ntango mosusu mingi kati na biso tokokomáká te, kasi ata bongo, Nsango oyo esengeli kokende na mokili mobimba. Tobondeli ete Ópambola ndeko na biso ya mobali, mpe ópesa ye Molimo na Yo, mpe tika ete Ékita likoló na ye. Kamba ye, mpe tambwisa ye ná mwasi na ye na bisika oyo, ntango mosusu, elimo moko ezali kuna, mpe bikuke ekoki kokangama te soki mpate moko wana akotisami te. Osepelaka na mpate ntuku libwa na libwa te. Ba . . . Nkombo nyonso oyo ekomami na Buku esengeli kokótisama. Sunga bango, Nkolo, wana totieli ye maboko, mpo ázala elongo na biso lokola ndeko na biso. Lisungi mpe mabondeli na biso mpo na ye, ekotambola elongo na ye. Mpe tobondeli ete Ópambola ye, Nkolo, bisika nyonso akokende. Na Nkombo na Yesu. Amen.

Ápambola yo, Ndeko Ben! Topesi yo mbote ya bondeko na loboko ya mobali, lokola bandeko batei. Nzambe ápambola yo, ndeko mobali.

³⁵ [Ndeko Earl Martin alobi: “Ndeko Branham, okoki kotiela ngai maboko, kobulisa ngai na mosala ya mokengeli?”—Mok.] John Martin . . . [“Earl.”] Earl.

Bato boni bayebi Earl Martin? Bato boni bandimi ete azali mosali ya Klisto? Ayei epai na biso, auti na . . . Nabanzi, na ebandeli, auti na etóngá ya ba-Pantekotiste, sikawa nakanisi ete azali mokengeli mpe asalaka mosala na ye moko.

³⁶ Nayebi ete Earl azali mosali ya solosolo ya Klisto. Asalaki likambo moko oyo nakobosanáká te, mingi esalema, kasi ezali na moko oyo Earl asálá. Nazali komikanisela ete na mpokwa moko babengaki ye, ntango nazalaki na Dallas, na Texas; to na—nabanzi, te, ezalaki . . . [Ndeko mwasi moko alobi: “Beaumont.”—Mok.] na Beaumont, na Texas, ezali bongo, ndeko mwasi. Mpe ba—ba . . . Bébé na ye azalaki kobunda na liwa, mpe bakanisaki ete asilaki kokufa. Azalaki lisusu kopema te. Mpe Ndeko Earl asalaki nyonso mpe ákómána na chambre na ngai, lokola papa, ná mapeka egumbama, afukamaki liboso na ngai, wana ngai nazalaki na mbeto. Nabalukaki mpe nakitaki; ayambaki ngai mpe alobaki: “Ndeko, nandimaka ete ozali mosakoli ya Nzambe. Nandimá yango ntango nyonso. Mpe soki olobi bobele liloba moko, atako bebé na ngai akufi, akozala na bomoi.” Mpe bebé na ye azongaki na bomoi, azali na bomoi.

³⁷ Bondimi ete alóngobani na mbote ya bondeko na loboko ya mobali ya bandimi oyo? [Losambo balobi: “Amen.”—Mok.]

Tóbondela, bandeko, wana totieli ye maboko.

³⁸ Tata na Ngolu na Likoló, totii lisusu maboko likoló na Ndeko na biso Martin. Totindi ye, Nkolo, na bisika ya mosika oyo Obongísá ete ákende; ézala na esika nini, bato bázala mingi to moke, na banzela ya milai, ya minene, pembeni na matiti, soki ezali. Ézala na esika nini, Nkolo, tika ete mapamboli na Yo ézala elongo na ye. Totieli ye maboko wana totómbeli ye elóngá na Yo mpe topesi ye mapamboli na biso, mpo Molimo oyo ezali likoló na biso, Nkolo, étambola elongo na ye, ékamba ye mpe émema ye epai milimo oyo ebúngá ezali, pembeni na matiti mpe na banzela. Totindi ye, na Nkombo na Yesu Klisto. Amen.

Nzambe ápambola yo, Ndeko Martin. Kende sikawa, mpe Nkolo ázala elongo ná yo.

³⁹ Mpo na ntina yango moko? [Ndeko Richard Blair asololi na Ndeko Branham—Mok.] Nkombo na yo Richard? [“Ezali bongo. Richard Blair.”] Bato boni bayebi Richard Blair? Bato boni bandimi ete azali mosali na Nzambe? Auti na e—etonga ya église Pantekotiste Unie.

Mpe ndeko, Ndeko Blair, nabosani te ndenge abengamaki na nkembo mingi. Nabosani te ntango oyo Ndeko Blair alingaki te, aboyaki kondimela ngai, mpo molimo moko ezalaki kokosa ye, koyebisáká ye ete nazalaki moto ya lokuta. Mpe wana afandaki na kati ya liyangani, Molimo Mosanto ebalukaki mpe etalisaki yango. Mpe etikalaki moke ásala dé—dépression, yango nde ezalaki kokómisa ye ndenge wana.

Mpe nazali komikanisela ete mwasi na ye kitoko abengaki ngai mokolo moko. Alobaki: “Ndeko Branham, nabanzi ete Richard alingi kokufa.” Mpe, nabanzi, azalaki na kitambala moko. Akendeiki kotielá ye yango, ndenge nayebisaki ye, mpe nabondelaki. Ye oyo.

⁴⁰ Bebé moko autaki kosala likama ya motuka, to, [Ndeko Blair alobi: “Mwana na ngai ya mobali.”—Mok.] mwana na ye ya mobali, na likama ya motuka, bazalaki lisusu na elikia mingi te mpo na ye, azalaki na commotion cérébrale. Mpe na nzela na libondeli, ata na telefone, bebé yango akomaki malamu.

Bondimi ete Ndeko Blair azali motatoli ya solo ya Klisto? [Losambo balobi: “Amen.”—Mok.] Bóbondela ete mapamboli na bino étambola elongo na ye.

Bandeko, bótiela ye maboko.

⁴¹ Nzambe molingami, mpo na kotalisa ndeko na biso ya motuya mpe ya lokumu, Mosali na yo, oyo atiki ata etóngá na ye moko, mpo na kotambola kati na Pole. Tata, tobondeli ete Ópambola Ndeko na biso Blair, wana totindi ye, ná mapamboli na biso mpe kondima na biso, wana totieli ye maboko, na bisika nyonso Okoki kobenga ye, Nkolo, ata mpo na mosala nini. Tika ete Molimo na Yo étambola elongo na Ndeko Blair. Kamba ye

mpe tambwisa ye epai ya baoyo babungi mpe bazali kokufa na mokili oyo, mpo ákoka kosunga mpo na komona mpate oyo abúngá, mpo ákoka kozongisa yango na lopango. Ekoki kozala ata esika nini, mpo na nyonso oyo Obongisi mpo na ye, Nkolo, tosengi bobele ete Molimo na Yo ékamba ye mpe étambwisa ye na mobembo mobimba ya bomoi na ye. Tozali bandeko na ye. Topesi ye mbote ya bondeko na loboko ya mobali, tosengi ete Ótambola elongo na ye, na Nkombo na Yesu Klisto. Amen.

Mbote ya bondeko na loboko ya mobali! Nzambe ápambola yo, Ndeko Blair. Tozali elongo na yo, mokama likoló na mokama, tokobondela mpo na yo mpe tokosala nyonso oyo tokoki kosala mpo na kosunga yo. Nzambe ápambola yo.

⁴² [Ndeko Merlin Anthon alobi: “Ezali ndenge moko mpo na ngai, Ndeko Branham, mpo na kobulisama.”—Mok.] Olobi nini? [“Kobulisama.”] Nkombo na yo nani? [“Merlin Anthon.”] Merlin Anthon. [“Nasambelaka awa.”] Wapi? [“Awa na losambo oyo.”] Na lingomba. Moto moko ayebi Ndeko Merlin Anthon? Azali moto nya sika, epai na ngai. [“Ya Armée du Salut. Omikaniseli?”] Oh, iyo. Limbisa ngai, ndeko.

Auti na Armée du Salut, ya solo, namikaniseli. Ya solo, nayebi ye sikawa. Ngai...Elongi na ye, emonanaki lokola nayebi yango te na ntango wana, na mbala oyo. Bato boni bayebi ete azali moto na Nzambe? [Losambo balobi: “Amen.”—Mok.] Bato boni bandimi ete—ete Nzambe azali kosala na ye? Bótombola maboko. [“Amen.”] Bokobondela mpo na ye? [“Amen.”]

⁴³ Sikawa, ndeko, toyebi ete outi na etónge moko ya bato malamú mpenza, Armée du Salu, bazali bato malamú mpenza. Kasi, mpe, kasi Armée du Salut basalaka mpenza mosala monene na balabala. Tokoki koloba eloko moko te mpo na kotelemela ba-Nazaréen, lingomba Pantekotiste, to Armée du Salut, to lingomba nini; bazali bandeko na biso. Kasi, bomoni, tondimaka ete tozali bamemi-Nsango moko ya motuya mpo na eleko mpenza oyo tozali kobika kati na yango. Olingi komema yango elongo na biso? [Ndeko Anthon alobi: “Amen.”—Mok.]

Tógumba mitó wana tozali kotiela ndeko na biso maboko.

⁴⁴ Molingami Tata na Likoló, Yo nde Obengaka bato. Yo nde Opesaka bomoi na Liloba, mpo bándima. Mpe totieli ndeko na biso ya motuya maboko, mpo na kotalisa ete tondimi ete Ozali elongo na ye mpe Okosunga ye. Totindi mapamboli na biso elongo na ye, biso baoyo tondimi ete tosili kolongwa na kufa mpe kokota na Bomoi mpe sikawa tozali na Nguya oyo epesaka bomoi na kati ya mitema na biso, na ngolu na Nzambe, totieli ndeko na biso maboko mpe totindi ye ná mapamboli na biso, ete Yo ókamba, ótambwisa mpe ómema ye na bisika ndenge na ndenge na mokili, Nkolo, oyo Obongísá ete ákende. Tika ete Molimo na Yo étambola elongo ná ye mpe pesa ye bokolongono, makasi,

mpe elóna na lotomo na ye, mpo totindi ye na Nkombo na Yesu Klisto. Amen.

⁴⁵ Nzambe ápambola yo, ndeko. Ezali mbote ya bondeko na loboko ya mobali, boyebi, bandeko, bópesa ye mbote ya loboko, bandeko, ndenge wana. Boye, yango nde... Malamu, Nkolo ápambola bino nyonso.

⁴⁶ [Ndeko Carrell alobi: “Na—natikálá kobulisama te, liboso na bato. Nalingi ete bótiela ngai maboko, lokola bango, na Nkombo na Yesu.”—Mok.] Ndenge, yo olingi. Mpe oyo ya yo... [“Ntango yango oyo, mpe na ntina moko lokola bango.”] Boye nkombo na yo nani? [“Ndeko Carrell, ya Cincinnati.”] Ndeko Carrell.

[Ndeko Carrell alobi: “Nazalaki motei oyo asilaki kobulisama, kasi nakokaki koyokana te ná ndeko oyo azalaki kobulisa basi lokola batei, bongo nasengelaki kokabwana na yango.”—Mok.]

Ndeko Carrell ya Cincinnati ye oyo. Moto oyo ayebi Ndeko Carrell átombola... Lokola auti na Cincinnati, nandimi te ete moto moko ayebi ye. Alobi ete azalaki na etonga moko, kasi etonga yango balingaki kobulisa basi lokola batei. Akokaki koyikela yango mpiko te, mpe asengelaki kokabwana na bango.

Ezali mpenza ndenge wana nde ngai nakabwanaki na ba-Baptiste Missionnaire. Molakisi Roy E. Davis, bato boni basíla koyoka ye? Na ntembe te, bosíla koyoka ye, bomoni. Alingaki kobulisa basi lokola batei, mpe nalobaki: “Te, misie. Lokola mpaka,” nalobaki, “nakoki kosala yango te, na lisosoli malamumu. Etelemeli Liloba na Nzambe.”

⁴⁷ Nayebi yo te, Ndeko Carrell. Kasi na mobóko ya litatoli na yo, mpe na Solo oyo ozui ngámbo na yango... Tozali na eloko te ya kotelemela basi yango te. Bazali bandeko basi. Tolingi bango. Kasi tondimaka ete bazali na esika na bango, mpe basengeli kotikala wana. Bomoni? Mpe tondimaka ete bazali molingami, lisungi mpo na mobali moko. Mpe ata moke te... Tokanisaka ete bazali likabo monene koleka, libanda na lobiko ya molimo, oyo Nzambe apésá na mobali. Kasi azali na esika moko te na eteyelo, kokokana na Liloba na Nzambe. Na moboko yango, mpe na kondima na yo epai na Nzambe, totieli yo maboko, mpo na kotalisa bandeko, mpo óya elongo na biso.

Tótiela ye maboko.

⁴⁸ Tata na biso molingami na Likoló! Elenge mobali oyo, nakoki mpenza koyeba ndenge azali komiyoka. Bauti koboya ye mpo na Solo ya solosolo. Mpo, “Moto akobika bobele na lipa te, kasi na Liloba mobimba.” Boye totieli ye maboko, totii mapamboli na biso likoló na ye. Tika ete Molimo na Yo ékamba ye, mpe étambwisa ye na mobembo mobimba ya bomoi na bisika nyonso oyo Okoki kotinda ye, Nkolo. Áyéba ete tozali kobondela mpo na ye, mpe ete tokozala lisungi mpo na ye, mpe tokosunga ye na

ntango nyonso oyo akozua ngámbo ya Solo. Kokisa yango, Nkolo. Totindi ye, na Nkombo na Yesu Klisto. Amen.

Nzambe ápambola yo, Ndeko Carrell.

Bótiela ye kaka maboko, moko na moko. Bino nyonso bópesa ye, tóloba, mbote ya bondeko na loboko ya mobali mpo na yango.

⁴⁹ Ndeko Ruddell, oyo, abulisámá naino te liboso na bato, awa na losambo. Bokoki . . . Bato boni bayebi Ndeko Ruddell? [Losambo balobi: “Amen.”—Mok.] Bisó nyonso toyebi ye. Bato boni bayebi ete azali moto na Nzambe? [“Amen.”]

Tata molingami na Likoló, lokola bampaka na Yo, totieli ndeko oyo maboko, oyo asili koleka na mai ya bozindo, ya potopoto. Amonaki bato kotangwa na eyanganelo na ye. Amonaki makambo ya ndenge na ndenge kosalema, kasi ata bongó andimi. Atako . . . ? . . . Totieli ye maboko, mpe topesi ye mapamboli na biso. Pakóla ye, Nkolo, na nguya, ná Liloba, Nkolo, mpe tinda ye na bisika ndenge na ndenge na mokili! . . . ? . . . ézala likoló na ye mpe ézunga ye. Mpe tinda ye, na Nkombo na Yesu Klisto. Amen.

⁵⁰ Ndeko Ruddell, ozalaka ntango nyonso na mbote na ngai ya bondeko, na loboko ya mobali. Nayebi Ndeko Ruddell. Azalaka lokola—lokola mwana na ngai mpenza. Papa na ye ná ngai, ná mama na ye, toyebáná kala. Mpe nayebi ete Ndeko Ruddell azali mosali na Nzambe. Nasálá mosala elongo na ye. Nzambe ápambola yo, Ndeko Ruddell.

⁵¹ Nkombo na ye nani? Yo nani, ndeko? [Moto moko alobi: “Semeki ya Ndeko Martin.”—Mok.] Ndeko Martin, oyebi ye, Ndeko Martin?

Nkombo na yo nani? [Ndeko mobali alobi: “Rev. McComas.”—Mok.] Ndeko McComas. Nabanzi ete moto moko te ayebi ye awa, kasi azali . . . Iyo, mobali oyo awa ayebi ye, Ndeko Tyler. Mpe ayei mpo na . . . tótiela ye maboko, mpo ázala momemi ya Nsango-malamu. Ndeko McComas, outi wapi, Ndeko McComas? [“Na Rockford, na Illinois.”] Na Rockford, na Illinois. [“Obengaki na ndako na ngai na mpóso eleki, to mokolo ya lendi na mpokwa, mpe obondelaki mpo na mwasi na ngai.”] Oh, ya solo? Auti na Tucson. [“Tucson, Arizona.”] Oh, namikaniseli sikawa kobenga yango. [“Atelemaki na ntongo oyo elandaki.”] Nkembo na Nkolo!

[Ndeko Martin ayebisi Ndeko Branham likambo moko—Mok.] Olobi nini? [“Leki na ngai ya mwasi, ya nsuka.”] Ndeko na yo ya mwasi. [“Azali awa sikawa. Akómaki paralizé.”] Boye, azali awa sikawa, tobondelaki mpo na ye, mokolo wana na mpokwa, uta na Tucson, na telefone. [“Paralizé.”] Ebós- . . . [“Akómaki paralizé, mpe azali awa sikawa.”] Akómaki paralizé, eleki mwa ba-mpokwa, mpe azali awa sikawa. Ndeko Martin ayebi yango, moninga. Kokamwa te ete akómi na mposa ya komema Nsango yango!

Tótiela ndeko na biso maboko.

⁵² Nzambe molingami, natieli mosali na Yo maboko, elongo na basali mosusu, mpe topesi ye mbote ya bondeko na loboko ya mobali, tobondeli ete mapamboli ya Nzambe é...?...oyo Obongísá ete ázala. Lipamboli na yo ézala likoló na ye, mpe kamba ye mpe tambwisa ye, na Nkombo na Yesu Klisto. Amen.

Mbote ya bondeko na loboko ya mobali, ndeko na ngai, mpe nyonso wana ézala elongo na yo. Nzambe ázala na yo.

⁵³ [Moto moko alobi: “Ndeko Branham?”—Mok.] Iyo, ndeko? [“Nazali na ndeko mosusu oyo azali mpe na mposa na yango.”] Malamu, mesie. Nabanzi ete oyo ezali... [“Ndeko Darris.”] Ndeko Darris. Ngai... [“Ngai nayebi Ndeko Earl ná Ndeko Brewer.”] Mobali oyo ezali Ndeko Darris. Outi wapi, ndeko? [“Na Black Rock, na Arkansas.”] Black Rock, Arkansas. Ndeko... [“Nayebi ye, ndeko.”]... ayebi ye. Moto mosusu, nabanzi, awa, alobaki... Ndeko Brewer. Nabanzi ete nakutanaki na bango, na ntongo ya lelo. Mpe—mpe Ndeko mwasi Vayle, nabanzi, Ndeko Vayle, ná baoyo bayebi ye, mpe bayebi ete azali moto na Nzambe, mosali na Nzambe. Malamu mingi!

⁵⁴ Ee, sikawa, ndeko na ngai molingami, mpo na kozala momemi ya Nsango oyo, tolingi ete óyeba ete tokozala nsima na yo, mpe tokosala nyonso oyo tokoki kosala. Tokozala kobondela mpo na yo, mpo yo mpe ómema Nsango oyo na bisika nyonso ya mosika oyo Nzambe asili kobongisa ete ókende.

Tótia maboko na biso likoló ya Ndeko na biso Darris.

Nzambe molingami, totii maboko na biso likoló na ndeko na biso, kopesa ye mbote ya bondeko na loboko ya mobali, mpe totindi ye na Nkombo na Yesu Klisto, ete Ópakola ye. Mpe...?...topesi ye mbote ya bondeko na loboko ya mobali!...?...Tika ete Molimo na Yo étambola elongo na ye, ékamba ye mpe étambwisa ye, na Nkombo na Yesu Klisto. Amen.

Nzambe ápambola yo, ndeko.

⁵⁵ Sikawa, nandimi, Ndeko Anthony. Mingi kati na bino boyebi Ndeko Anthony. Azalaka awa elongo na biso banda kala. Nayebi ete ye azali mosali na Klisto, ngai moko. Nandimi ete azali elenge mobali moko amibulisá. Batiélé ya naino maboko te, liboso na bato. Ayebaki te ete ekosalema, baninga. Bomoni? Kasi sikawa nde ntango malamú, lokola ntango nyonso. Boye, tokotiela Ndeko Anthony maboko mpe tokopesa ye mbote ya bondeko na loboko ya mobali. Nzambe nde asengeli kobulisa moto na mosala. Oyo ezali kaka mpo ye áyeba, mpe bino bóyeba ete tondimi ndeko oyo mpe tolingi ye, mpe azali moko na biso, kati na Nsango oyo. Mpe tolingi ete ázala na mapamboli ya Nzambe, mpe yango nde tosenge ete ézala likoló na ye. Tóbondela, wana totieli ndeko maboko.

⁵⁶ Nzambe molingami, elenge Italien ya komikitisa oyo, mosali ya Yo, Nkolo, ayei na mpokwa oyo, mpo tó—tótíela ye maboko, mpe lingomba epesi ye mbote ya bondeko na loboko ya mobali. Nkolo, tika ete Nguya na Yo monene étinda elenge mobali oyo na bitúka ya mokili, na bisika nyonso bibombáná oyo Obéngi ye kokende. Mpe tika ete ákende kokangola bato yango na masumu mpe na maladi, mpe ásalela Yo, Nkolo, mikolo nyonso na bomoi na ye. Tika ete Ókamba ye, Ótambwisa ye. Tika ete mapamboli na biso ézala elongo na ye, wana totindi ye, na Nkombo na Yesu Klisto. Amen.

Nzambe ápambola yo.

⁵⁷ [Moto moko asololi na Ndeko Branham—Mok.] Hah? Oh, nayebi te. Bato bazali kolanda biso na telephone; ba-centime ntuku mitano na miniti moko. Moto mosusu azalaki awa oyo alingaki. . .

Bómata awa mpe bóloba bankombo na bino, oyo bino bozali, bandeko, na micro oyo ezali *awa*. Yebisa bango yango. [Ndeko moko na moko alobi nkombo na ye: “Pat Tyler,” “Claude Boggess,” “Dale Potter,” “. . .? . . .Henasey,” “James Humes,” “Earl Horner.”—Mok.] Ezali nde bango? [Moto moko alobi: “Iyo.”] Bandeko na ngai.

Mibali oyo, bondimi ete Nsango oyo ezali Solo kouta na Liloba na Nzambe? [Bandeko balobi: “Amen.”—Mok.] Bondimi yango na motema mobimba? [“Amen.”] Malamu. Mpe bozali na mposa mpenza, mpe bokanisi ete soki totieli bino maboko. . . Tolingi ete bóyeba ete tozali elongo na bino, mpe tokosala nyonso oyo tokoki kosala mpo na kosunga bino.

Sikawa, mpo nákoka mpe kotiela bango maboko, nalingi ete bino bandeko bómata awa sikawa. Mpe biso nyonso tógumba mitó, wana totieli bango maboko.

Nzambe molingami, tala etonga mobimba ya mibali. Natieli moko moko na bango maboko, na Nkombo na Yesu Klisto, Mwana na Nzambe. Mpe tika ete Yo, Oyo obengi bango mpo bázala batei, sala ete báteya yango, Nkolo, mikolo nyonso na bomoi na bango, mpe. . .? . . .báteya Nsango—malamu na bikelamo nyonso. Topesi bango mbote ya bondeko na loboko ya mobali, mpe tobondeli ete mapamboli na Yo ézala elongo ná bango, Nkolo, wana topamboli bango mpe topesi bango mapamboli na biso. Tika ete bákende na bisika nyonso bibombaná na mokili oyo Obengi bango bakende. Tika ete básala mpe básalela Yo na makoki oyo Obengi bango ete básala. Tika ete bázala na mpiko mpe bazala basali ya solosolo ya Nzambe. Sala yango, Nkolo. Mpe tosengi yango na Nkombo na Yesu Klisto.

⁵⁸ Nzambe ápambola bino, bandeko nyonso. Nzambe ápambola bino. Nzambe ápambola yo, ndeko. Nzambe ápambola yo. Nzambe ápambola yo, Ndeko Humes. Nkolo ázala na moko na moko na bino.

Ekanganelo oyo esangisi
 Mitema na biso na bolingo ya Baklisto
 épambolama;
 Boyokani na bandeko
 Ezali lokola oyo ya Likoló.

⁵⁹ Azali malamumu mingi, boye te? Bokanisa naino sikawa, batei boni bazali awa na mpokwa oyo mpo tótiela bango maboko!

⁶⁰ Nayebaki te ete bato bazali kolanda biso na nzela na telefone. Bato oyo bazali kuna bálimbisa ngai mpo na yango; nayebaki yango te. Bomoni? Nayebaki te ete balingaki koyokisa Nsango moke oyo na mpokwa oyo. Kasi tozali. . .

⁶¹ Sikawa tokotángá Liloba mpe tokobondela, mpe tokokóta mbala moko na Nsango oyo nazali koyoka ete Molimo Mosanto alingi ete nápesa bino na mpokwa oyo.

⁶² Sikawa, wana tozali kozua...lokola motó ya liteya, nakopesa yango nsima na miníti moke. Tózua Mituya, mokapo ya 22, molongo ya 31. Mituya 22:31, lokola motó ya liteya. Wana bozali koluka yango, soki bolingi kotángá yango, kotángá yango to kokoma yango.

⁶³ Nalingi ete bino nyonso bókanisa ngai, kino mokolo nakomona bino lisusu, nabanzi, na eleko ya été oyo, soki Nkolo alingi. Soki likambo moko esalemi, mpe esalemi ete nakoki kokende na mikili mosusu te, nakozonga. Kasi tondimi sikawa, ndenge makambo nyonso ezali kotambola, ete Molimo Mosanto akokamba biso sikawa na nzela oyo Ye moko Aponi mpo na kotinda biso. Mpe ndenge wana nde tolingi kosala yango. Nkolo ápambola!

⁶⁴ Tata, tozali pene na kotángá Liloba na Yo. Ópambola Yango mpe Ópakola Yango mpo na lisosoli na biso, tosendi yango na Nkombo na Yesu Klisto. Amen.

⁶⁵ Buku ya Mituya, mokapo ya 22, molongo ya 31.

Bongo *Yawe afungolaki miso na Balame mpe ye amonaki mwanje na Yawe kotelema na njela, na mopanga na loboko na ye: agumbaki motó na ye mpe akweyaki na elongi na ye.*

⁶⁶ Sikawa, na litángi oyo, mpo na kotonga ndimbola moko zinga-zinga na yango, nalingi kozua motó ya liteya: *Nzambe Abongolaka Nde Makanisi Na Ye Na Ntina Na Liloba Na Ye?*

⁶⁷ Ezali motó ya liteya moko ya ndenge, mpe ezali Solo monene oyo tosendi kososola. Nzambe akoki nde koloba likambo moko bongo áloba: “Bólimbisa Ngai ndenge Nalobaki yango”? Nzambe akoki nde kobongola Liloba na Ye, nsima na Ye koloba Yango?

⁶⁸ Sikawa, maloba yango, ntina oyo esali ete nápona maloba oyo, ezali mpo ezali moko na maloba ya Biblia oyo motángi azoluka kososola, to koluka koloba ete Nzambe abongolaka

mpenza likanisi na Ye; awa emonani mpenza lokola ete Abongolaki likanisi na Ye koleka esika mosusu nyonso ya Biblia, na oyo nayebi, mpo Ayebisaki Balame likambo moko, na nsima Ayebisaki ye likambo mosusu. Sikawa, bato mingi balukaka kokómisa Balame mwa, oh, mwa moto na solóka to eloko moko ya ndenge wana. Kasi Balame azalaki moto na solóka te. Azalaki mosakoli na Nkolo.

⁶⁹ Sikawa, tokotalisa naino, tóloba, mobóko ya Nsango yango, liboso. Yisraele bazalaki kati na mobembo na bango, bautaki na Pales- . . . bazalaki kokende na Palestine, bautaki na Ezipito. Mpe Nkolo azalaki elongo na bango, mpe bazalaki . . . Monguna nyonso oyo azalaki kotelema liboso na Yisraele azalaki kolongolama na nzela, mpo Nzambe alobáká ete Akotinda banzoi liboso na bango mpe akobengana banguna, na ntango nyonso oyo bazalaki kotambola na botosi ya etinda na Ye. Mosala yango ezalaki monene koleka te. Ba-Amaleke, bingambe ya eleko yango, bazalaki mpamba mpo na Yisraele. Ata bazalaki mikuse, kasi bazalaki kotambola kati na YANGO ELOBI NKOLO. Boye, ata kotelemela ezalaki boni, Nzambe asalaka ntango nyonso ete Maloba na Ye ya elaka ézanga ata moke te kokokisama mpo na Yisraele.

⁷⁰ Mpe Yisraele ya Kondimana na Kala ezali elilingi ya Mwasi na libala ya Kondimana na Sika, oyo azali kobima na—na mokili, azali na zela kokendéké na Kanana, to Kanana oyo biso tozali kokende, na Millenium.

⁷¹ Sikawa, sikawa, tomoni ete Moaba awa ezali elilingi ya lingomba. Mpe Moaba . . . Bautaki koboma mwa bakonzi mpe kopalanganisa monguna, koboma nyonso, kobotola mboka yango mpe kokóma pembeni na Moaba. Sikawa, Moaba ezalaki ata moke te ekólo ya bapagano. Moaba ezalaki ekólo oyo ezalaki kosalela kaka Nzambe oyo Yisraele ezalaki kosalela. Mpe mboka ya Moaba, na ebandeli, ebandisamaki na mwana mobali ya Lota, oyo abotaki na mwana na ye moko ya mwasi. Mpe ye, lokola azalaki mobandisi ya ekólo yango, asilaki kobongisa bato na ye ya lokumu mpe nyonso wana, akómisaki yango ekólo monene, mpe basilaki koyikana mpe kokóba ndenge wana.

⁷² Mpe, sikawa, Yisraele ezalaki momboto ya Abraham, ya Lota te. Yisraele eutaki na Yisaka, na Yakobo. Mpe Yisraele eutaki na mabota zomi na mibale ya Yakobo, oyo na nsima ebengamaki “Yisraele,” mpo abundaki ná Nkolo. Mpe Moaba awa . . .

⁷³ Sikawa, na yango, mpe bino baoyo bozali kolanda na—na telephone, nalingi liboso koloba ete na—nalingi kopámela moto te, mpe nabanzi nazali kosala yango te. Kasi, Nsango oyo epesameli ngai, nasengeli kozala sembo na Nsango yango, soki te nakozala moto na bilongi mibale. Bomoni? Na—nakoki bobele koloba oyo natíndami koloba.

Mpe na—nakanisaka ete monguna monene ya lisanga ya Boklisto lelo ezali mangomba ya ebongiseli. Nandimaka mpenza na motema na ngai mobimba ete sukasuka ekosala elembo na nyama, oyo nakoki, nakanisi nakoki kotalisa yango polele na nzela na Biblia, na lisungi ya Nzambe. Nasilá kosala yango. Ete, ekosala elembo na nyama, kati na lisanga ya mangomba. Mpamba te, Nzambe, ata na ntango moko te, atikálá kondima lingomba oyo ebongisami, lingomba oyo ekómi ebongiseli, ata moke te. Atikálá kosala yango te.

Mpe mbala nyonso oyo moto asalaki ebongiseli, Molimo ya Nzambe etikaki yango mpe etikálá kozonga lisusu te. Bótuna historien nyonso, to ntango mosusu yo moko bosilá kotánga yango. Ata moke te! Ntango bakómaki ebongiseli, Nzambe atiaki yango na etáláká, mpe kuna nde epai ekendeki; mpe etikálá kuna, banda wana. Motángo ya bandimi ebakisamaki, kasi kolamuka ya Molimo ezalaki lisusu ata moke te; ezalaki lisusu ata moke te.

⁷⁴ Moaba, awa, azali elilingi na yango, mpo bango ekómaki e—ekólo ya ebongiseli; kati na mboka na bango moko, lokola kati na denomination na bango. Bazalaki na ba-religion na bango moko, mpe religion na bango ezalaki kaka religion moko oyo Yisraele azalaki na yango. Bazalaki Bamoaba mpe bazalaki kondima Nzambe Jehovah, kasi bazalaki etónga moko ya bato oyo bakómaki ebongiseli.

⁷⁵ Mpe, sikawa, wana bango bazali kotalisa lingomba ya mokili, Yisraele ezali kotalisa lingomba ya molimo kati na mobembo na yango. Sikawa, Yisraele ezalaki ekólo ya ebongiseli te. Na ntango nyonso oyo bazalaki kolanda Nzambe, bazalaki na bonsomi. Bayaki wana, bazalaki kati na mobembo, bazalaki na esika ya kokende te. Bisika nyonso Likonzi na Móto ezalaki kokende, bazalaki kokende elongo na Yango. Bazalaki ekólo ya ebongiseli te. Bazalaki na mabongisi kati na bango, mpo kokátama ngenga epesaki bango yango kokokana na mobeko ya Nzambe, kasi bazalaki ekólo ya ebongiseli te na ntango yango. Sukasuka, ntango bakómaki ekólo ya ebongiseli, na ntango yango nde bakweyaki mpe baboyaki Masiya na bango.

⁷⁶ Sikawa tomoni, ntango nyonso, ete ntango milimo oyo ya mokili ná ya molimo, ya mangomba ná bibongiseli, ekutanaka, botutani ezalaka ntango nyonso. Ezangaka ata moke te kozala bongo. Ezalaka ntango nyonso botutani. Mpamba te, tomonaka ete zuwa ezalaka na kati. Mpe zuwa yango ebotaka komíkokanisa na nzoto, komekola. Mpe tozali komona yango lelo, ndenge ezalaki na eleko wana. ntango Nzambe asali eloko moko mpo na moto moko, bato nyonso bakoluka komekola mpenza eloko oyo Nzambe asalaki mpo na moto yango. Bomoni, ebotaka kowelana, mpe epesaka bizaleli ya nzoto. Na nsima, soki ngámbo oyo mosusu bakoki kozua mbano ya molimo te, na bongo bakoza yango na nguya ya politiki, to bakotia eloko mosusu na

esika na yango, mpo na kotia mobulu na makanisi ya bato, mpo na kobenda bayekoli nsima na bango.

⁷⁷ Yango mpenza nde esalemaki na ebandeli mpenza; ntango Kaina ná Abele, bana mibali nyonso mibale bazalaki awa na mokili. Ntango Abele abonzelaki Nzambe mbeka ya malamukoleka oyo ya Kaina, Nzambe atatolaki Abele, na koyáká mpe koyambáká mbeka na ye, epesaki Kaina zuwa, mpo akómaki na zúwa ya ndeko na ye, mpe abomaki ndeko na ye.

⁷⁸ Ebandaki na ebandeli, ntango oyo ya mokili ná ya molimo . . . Nzokande Kaina ná Abele bazalaki kokumbamela Nzambe yango moko, bango mibale batongaki bitumbelo ya ndenge moko, mpe bango mibale bazalaki kokumbamela Nzambe moko, na losambo moko, na etumbelo moko. Kasi Kaina, na lobanzo ya mosuni, amemaki mbuma ya mabelé mpe atiaki yango likoló na etumbelo lokola mbeka, kokanisáká ete, na ntembe te, yango nde elingaki koyanola na bosenga ya Nzambe mpo na bolimbisi. Boye, na ntembe te amemaki, ndenge bato bakanisaka lelo, “ba-póme oyo Adama ná Eva baliáká, oyo ebótáká lisumu.” Mpe, ézala nini, nakanisi ete sikawa bakómi koloba ete ezalaki mbuma oyo “grenade” to eloko moko bongo, sikawa. Bamosusu kati na bango balobaki, eleki ntango molai te, ete ezalaki eloko mosusu.

⁷⁹ Mpe, kasi Abele azalaki na mbeka oyo esengelaki. Ayebaki ete makila nde ebandisaki yango, na bongo, amemaki mwana mpate. Mpe Nzambe ayambaki oyo ya ye, sikawa, Abele, na nzela na kondima, na nzela na emoniseli, na nzela mosusu te. Biblia ekomamaki naino te. Boye, bomoni, ebandeli ya boyengebene ezali Solo ya Nzambe, oyo emonisami, mpe Lingomba mobimba ya Nzambe na bomoi etongami likoló na yango.

⁸⁰ Yesu, mokolo moko, azalaki kokita ngomba, alobaki na bayekoli na Ye: “Bato balobaka ete Ngai Mwana na moto nazali nani?”

“Moko alobaki Ozali Mose, mpe mosusu alobi Ozali Eliya, mpe Ozali Yilimia, to moko na basakoli.”

Alobaki: “Kasi bino bolobaka ete Ngai nazali nani?”

⁸¹ Na ntango yango nde ntoma Petelo, ntango Nzambe apemelaki ye mpe Molimo epesaki ye bomoi, alobaki maloba ya motuya oyo ete: “Ozali Klisto, Mwana na Nzambe na bomoi.”

⁸² Bótala maloba yango. “Esengo na yo, Simona mwana na Yona, mosuni mpe makila emonisi yo yango te. Tata na Ngai na Likoló nde amonisi yo yango. Ozali Simona. Likoló na libanga yango . . .”

Libanga nini? Sikawa, ba-Katoliko balobaka: “Likoló na Petelo, libanga, libanga ya moke.” Mpe ba-Protestant balobaka: “Likoló na Klisto, Libanga.”

Ezali mpo na kokesana te; kasi ezalaki likoló na emoniseli oyo Petelo azalaki na yango, Oyo Ye azalaki. “Moto moko te akoki koya epai na Ngai,” Yesu alobaki, “soki Tata na Ngai abendi ye te. Mpe baoyo nyonso Tata apésá Ngai bakoya epai na Ngai.”

“Ozali Klisto, Mwana na Nzambe na bomoi.”

⁸³ “Esengo na yo, Simona, mwana na Yona; mosuni mpe makila emonisi yo yango te, kasi Tata na Ngai oyo azali na Likoló. Likoló na libanga yango Nakotonga Lingomba na Ngai, mpe bikuke ya ewelo ekoki kolonga yango te.” Liloba na Nzambe emonisami na Molimo!

⁸⁴ Bótala, Abele, na kondima na Nzambe, apesaki mbeka ya malamumu koleka. Mpe mondimi ya mosuni akanisaki ete ezalaki misala ya maboko na ye moko, ete, mbuma na ye ná mbeka na ye ya kitoko oyo amemaki, nde Nzambe alingaki kondima, mpe likambo yango ebotaki botutani.

Tomoni ete Abraham ná Lota basengelaki kotutana.

⁸⁵ Tomoni ete Mose ná—ná Datana, ná Kora, bazalaki na botutani yango moko.

Mose, lokola mosakoli oyo abulisamaki ná Liloba na Nkolo, atatolami ete aponamaki mpo na kozala mokambi na bango na eleko yango, mpe ete Abraham asiláká kolaka makambo nyonso wana, mpe tala, Mose asalaki mpenza oyo Nzambe alobáká ete ekozala, ete ekosalema.

Mpe Kora, lokola moto na mosuni, alingaki kotelemisa ebongiseli moko katikati na bango. Alingaki kosala etonga moko ya bato. Kasi Nzambe asalaka na bato ndenge wana te. Etalisi wana mpenza, na Likomi yango, elilingi ya mobembo lelo, ete ebongiseli ezali te eloko oyo Nzambe abongísá. Mpamba te, kaka ntango Kora asalaki bongo, alobaki na Mose: “Ozomizwela yo moko makambo nyonso.” Na elobeli mosusu: “Bato nyonso na eyanganelo bazali basantu! Ee, olobaka bobele yo nde moto mosantu. Ozali na makoki ya kosala likambo ya ndenge wana te. Ozoluka komikómisa moto moko monene. Bisu nyonso tozali basantu. Bisu nyonso tozali bana na Nzambe.”

⁸⁶ Mpe Mose abalukaki kaka mpe alongwaki wana. Alobaki: “Nkolo, násála nini?”

⁸⁷ Nzambe alobaki: “Kabwáná na ye. Nalembi makambo yango.” Mpe Asalaki ete mabelé émela ye.

⁸⁸ Bomoni, botutani ezalaki. Ntango moto ya mosuni ná moto ya molimo bakutanaka, ezalaka ntango nyonso botutani. Ntango Yudasi ná Yesu bakutanaki, botutani ezalaki: Moko azalaki Mwana na Nzambe; mosusu mwana ya Satana. Lokola Kaina ná Abele, botutani ezalaki ntango bakutanaki. Moko na bango azalaki mobombi misolo ya losambo, mosusu Mokengeli. Mpe sikawa, lelo tokómi lisusu na likambo yango moko.

Denomination ya mosuni ekutani ná Mwasi na libala ya Klisto na molimo. Mwasi na libala ya Klisto na molimo akeseni mingi mpenza na bibongiseli ya mosuni, na lolenge ete kokokanisama kati na bango ezali ata moke te.

⁸⁹ Sikawa bótala, oyo ya mokili elukaka ntango nyonso komekola oyo ya molimo. Kasi, pelamoko na Yakobo ná Esau, ekosimba te. Elingaki te. Sikawa, na oyo etali kosala misala malamumu, na—nabanzi ete Esau azalaki mpenza moto malamumu koleka Yakobo, na miso ya bato. Azalaki koluka kobatela papa na ye; azalaki mokufi miso, mosakoli. Mpe ná makambo nyonso oyo azalaki koluka kosala, kasi ata bongo, Esau azalaki kokanisa te ete wana ezali na yango misala ya mosuni. Azalaki kokanisa ete akokaki kokota mpo na oyo asilaki kosala, kosalela moto bolamumu, ezalaki na yango mabe te. Kasi Yakobo, na elimo na ye mobimba azalaki mpenza kozua makoki ya bokulutu, mpe yango nde likambo ya molimo oyo Nzambe amonaki kati na ye.

⁹⁰ Bótala, mpe esalaka ntango nyonso ete oyo ya mokili áyina oyo ya molimo. Esalaki ete Kaina áyina Abele. Esalaki ete Kora áyina Mose. Esalaki ete Yudasi áyina Yesu. Mpe ezali kokoba ndenge wana. Ezali kosala ete oyo ya mokili áyina oyo ya molimo, kaka ndenge Kaina ayinaki Abele na ebandeli, ye oyo Nzambe ayambaki mbeka na ye, mpe alukaka koboma bango.

Balukaka kutu kobebisa lokumu na ye. Balukaka kobebisa nyonso, mpo ezali eloko mosusu te, bobele zúwa. Ebandaki na Kaina, etalisamaki polele ete ezalaki zúwa, mpe ezali ndenge moko lelo, ntango oyo ya mokili (ya mosuni) ná oyo ya molimo bakutanaka. Etalisaka polele ete ezali Satana, nzela mosusu ezali te, mpo zúwa eutaka na Satana. Na nsima, ememaka komekolama ya Solo, moto moko koluka komekola eloko oyo ya ezali te, oyo babongisámá te mpo na mosala yango. Tokómi mpenza komona makambo yango mingi na ntango oyo ya nsuka! Oh! la la! makambo yango mingi!

⁹¹ Boye tomoni ete Nzambe asal-. . . abongolaka makanisi na Ye te na ntina na Liloba na Ye ya ebandeli. Kasi, moto oyo Ye abengi, nde oyo Ye abongisi. Moto mosusu akoki kozua esika yango te. Moto moko te akokaki kozua esika ya Mose. Ata ba-Kora boni batelemaki, mpe ba-Datana boni; ezalaki Mose nde Nzambe abengaki, ata ndenge nini.

⁹² Kasi, soki bato bakolinga te kotambola kati na mokano mobongi be na Ye, Azali mpenza na mokano ya ndingisa, Akotika yo kotambola kati na yango. Bótala, Apesaka ndingisa, malamumu, kasi Akosala ete ésalema mpo na nkembo na Ye, kati na mokano mobongi be na Ye. Sikawa soki bolingi. . .

⁹³ Kaka lokola, na ebandeli, ezalaki te mokano mobongi be ya Nzambe mpo na bana kobotama na mokili na nzela na koyebana nzoto. Te, misie. Nzambe akelaki moto uta na putulú ya mabelé, apemaki pema ya bomoi kati na ye, mpe akómaki

elimo na bomoi. Azuaki mosungi moko uta na moto yango mpe Asalelaki ye mwasi moko. Yango nde ezalaki mokano na Nzambe ya liboso mpe ya ebandeli. Kasi ntango lisumu ekotaki mpe esalaki likambo esalaki, na bongo Apesaki nzela ete mobali ábala mwasi, kokokana na mobeko, mpe ábota bana na nzela na ye. “Bóyikana mpe bótondisa mabelé kasi, soki lolenge wana nde bolingi kosala yango.” Kasi, bomoni, ezalaki mokano mobongi be na Ye te.

⁹⁴ Yango wana, makambo nyonso oyo ezalaki na ebandeli esengeli kozala na nsuka. Masumu nyonso esengeli kolimwa. Masumu nyonso esengeli kolongolama. Yango wana, na Millenium ya nkembo, ntango lisekwa ekosalema, tokozala lisusu na ntina ya kobotama na batata ná bamama na biso te, kasi Nzambe, ndenge Asalaki na ebandeli, akobenga mobali longwa na putulú ya mabelé, ná mosungi na ye elongo na ye. Ya solo. Ezali lolenge wana nde Asalaki na ebandeli.

⁹⁵ Boye na yango, Nzambe abongolaka makanisi na Ye ata moke te na ntina na eloko moko te, kasi Akopesa yo ndingisa ya kokóba. Sikawa, oyo ezali nzela molai mpo na kokóma na oyo nalingi koloba awa na ntina na yango. Kasi, mpe, kasi, ezali, boko . . . Nalingi ete bósosola yango. Bomoni? Nzambe akopesa yo ndingisa ya kosala likambo, mpe Akopambola yo ata mpo na kosala yango, kasi ata bongo, ezali mokano mobongi be na Ye te.

⁹⁶ Nzambe apesaki Yisraele ndingisa ya kozua mobeko, na Esode mokapo ya 19. Na ntango oyo ngolu esilaki kopesa bango mosakoli, Likonzi na Móto, mwana mpate ya mbeka, nguya ya kokangola, kasi bango bazalaki kosenga Mobeko na mongongo makasi. Ezalaki mokano ya Nzambe te, kasi ekotisamaki mpo moto alingaki yango. Mpe alakelamaki mabe kaka na mobeko oyo alingaki.

⁹⁷ Eleki malamumu koleka kozala na mokano na Nzambe. Yango nde Alakisaki biso. “Mokano na Yo ésalema. Bokonzi na Yo éya. Mokano na Yo ésalema.” Tosengeli kotosa mokano na Ye mpe Liloba na Ye. Kotia Yango ntembe te. Ndimba Yango nde. Koluka nzela ya kozunguluka Yango te. Kamata Yango kaka ndenge Ezali.

Bato mingi balingaka kozunguluka, kolanda nzela mosusu. Ntango osali bongo, okomona ete ozali kokóba, okomona ete Nzambe azali kopambola yo, kasi ozali kosala na mokano na Ye ya ndingisa, kasi na mokano mobongi be na Ye te, mokano ya Nzambe.

⁹⁸ Apesaka yango ndingisa, ndenge nalobaki, kasi Ako—Akotika te ete ézala mokano mobongi be na Ye; kasi Akosala ete étambola mpo na kokumisa mpe kopambola mokano mobongi be na Ye. Mpe kobota bana, na nzela na koyebana nzoto, ezali moko na yango.

⁹⁹ Sikawa bótala, Moaba, mpo na kobanda, ezalaki ekólo oyo ezalaki libanda na mobeko. Ebandaki, libanda na mobeko, ata na—na tata mondimi mpe mwana mwasi oyo azali mondimi.

Ezali mpenza ndenge moko, soki botali elilingi yango mpe bosaleli makanisi ya molimo, bokomona dénominasion kotelema wana polele mpenza. Ya solo. Bomoni, mobimba na yango ezali mpenza libunga. Mpe, bótala, na ntango ememami, ebandaki ndenge wana, ekoki ata moke te. . . Ekobaka, lokola libungutulu ya neige, ekobaka kobaluka, kobaluka mpe kobaluka. Soki ozui libunga moko, mpe obandi na libunga moko wana, okokoba kobaluka, likambo moko nsima na mosusu, likambo moko lokola mosusu, nyonso nsima na mosusu.

¹⁰⁰ Ndenge wana nde lingomba ebandaki. Ndenge wana nde ebandaki na Nicée, na Roma, ntango lingomba Katoliko ya Roma. . . Na ebandeli mpenza, epai oyo yango eutaki, ezalaki Pantekote. Kasi ntango bakómaki ebongiseli mpe bakotisaki bato ya lokumu na lingomba, babandaki kosala, kozongela mabondeli, kotánga bambuma ya chapelet, mpe—mpe kobondela mpo na bato bakúfá, mpe makambo mosusu ya ndenge na ndenge. Na nsima, ebandaki kobaluka, longwa na libunga moko kino na mosusu, libunga moko kino na mosusu, na lolenge ete bótala epai ekómi. Ata etaliseli ya pantekote moko te etikali na kati, ata moke te. Bomoni? Libunga moko ebakisami na mosusu, ebakisami na mosusu. Likambo ya kosala ezali kaka moko, ezali, kolongola makambo nyonso mpe kozonga na ebandeli.

¹⁰¹ Ntango Martin Luther abandaki na kolongisama. . . Oyo esengelaki kozala lingomba ya Luther oyo ekóli mingi. Bomoni? Soki. . . Luther, ntango akómaki ebongiseli, akokaki koyamba kobulisama ya Wesley te, mpo akómaki ebongiseli; mpe bato yango balingaki kozua ngámbo na yango te, na bongo, Molimo etikaki yango.

¹⁰² Sikawa, etóna ya Lota awa; to, Moaba azalaki mwana ya mwana mwasi ya Lota, azalaki libanda na mobeko, mpo na kobanda. Sikawa bótala, lokola lingomba ya mokili, Moaba ezali kotalisa denomination ya mokili.

Yisraele ezali kotalisa Lingomba ya molimo. Yisraele, lokola lingomba ya solosolo, ezalaki mwasi na libala ya eleko wana, oyo abengamaki kobima na Ezipito, mpe atatomaki lokola solo.

¹⁰³ Bótala ntango bango mibale bakutanaki. Bango mibale bapesaki mbeka yango moko, bango mibale batongaki, bamonaki bitumbelo nsambo, bango mibale bapesaki mbeka ya peto, ngombe mibali. Mpe bapesaki ata mpate mibali, kotalisáká ete Masiya moko azalaki koya. Kokokana na mibeko, bango mibale bazalaki mpenza ndenge moko. Yisraele, awa na lobwaku; Moaba, kuna na ngomba. Moaba ná bitumbelo nsambo; Yisraele ná bitumbelo nsambo. Moaba ná ngombe mibali nsambo; Yisraele ná ngombe mibali nsambo. Moaba na

mpate mibali nsambo, kotalisáká Masiya oyo akoya; Yisraele ná mpate mibali nsambo.

Bokeseni nini ezalaki kati na bango? Kokokana na mibeko, bango mibale bazalaki na elonga. Kasi, bomoni, Moaba bazalaki na kotatolama na Nzambe elongo na bango te; bazalaki bobele ekólo, etonga moko ya bato ya lokumu. Kasi Yisraele bazalaki na mosakoli elongo na bango. Bazalaki na Libanga ebétami elongo na bango. Bazalaki na Likonzi na Móto. Bazalaki na nyoka ya motáko, mpo na lobiko na nzoto. Bazalaki na mapamboli ya Nzambe kotamboláká elongo na bango, mpe bazalaki bana na Nzambe oyo babengamaki kobima.

¹⁰⁴ Sikawa tomoni yango kotalisama mpenza awa na mangomba ya lelo. Moaba, bango bazalaki bongo te. Yisraele bazalaki kati na mobembo, kokende longwa na esika moko kino esika mosusu; bipai nyonso Likonzi na Móto wana ezalaki kokende, bazalaki kokende elongo na Yango. Mpo na Moaba, ezalaki bongo te; basilaki kofanda na kati ya denomination na bango moko, na kati ya ekólo na bango moko. Bakendeki esika moko te, batikalaki mpenza wana. Bazalaki na bato na bango ya lokumu. Babongisaki makambo ndenge basengelaki kosala, mpe bazalaki na bato na bango ya bitumba, bazalaki na babundi na bango, bazalaki na mokonzi na bango, oyo azali kopesa bango mitindo, mpe bongo na bongo.

¹⁰⁵ Kasi Moaba bamonaki ete Yisraele azalaki na eloko moko oyo bango bazalaki na yango te. Bamonaki nguya moko ya monene katikati ya Yisraele, yango ezalaki mosakoli. Mpe mosakoli yango ezalaki Mose. Mpe bayebaki ete soki etumba etamboli malamumu te, bazalaki kaka kotombola maboko na ye mpe kosimba yango, mpe etumba ezalaki kobongwana. Boye, lokola bango bazalaki na likambo ya ndenge wana te, na bongo balukaki kokokana na bango na nzela na politiki, na kobendama ya politiki. Babengisaki mosakoli moko na ekólo mosusu mpe bazuaki ye na mosala mpo áya epai na bango, mpo bákoka kozala na mosakoli, mpe bákóma na nguya epai na bango, ndenge Yisraele bazalaki na yango katikati na bango.

¹⁰⁶ Bozali komona komikokanisa ya mosuni? Bozali komona lingomba ya mosuni ya lelo? Esali mpenza ndenge moko.

¹⁰⁷ Bótala, sikawa, bango mibale bakómi na basakoli. Bokeseni kaka moko ezalaki ete Mose, mosakoli ya Nzambe, Mokonzi na ye ezalaki Nzambe. Kuna nde epai azalaki kozua mitindo na ye, uta na Liloba na Nkolo. Balame, ye mpe, azalaki na mokonzi, mokonzi yango ezalaki Balake, mokonzi ya Moaba, mpe kuna nde epai azalaki kozua mitindo na ye mpe mapamboli na ye. Boye Moaba alobaki na Balake: “Yaka,” to, na Balame, alobaki, “yaka kolakela bato oyo mabe, mpo batondisi mabelé mobimba. Bauti koya mpe bakómi kosilisa biloko nyonso, ndenge ngombe mobali aliaka matiti.” Alobaki: “Yaka sikawa. Mpe nasosoli

ete okoki kolakela mabe, okoki kopambola, nyonso oyo osalaka endimamaka.”

¹⁰⁸ Sikawa, tolingi komona ete mobali yango azalaki mosakoli oyo abongisamáká na Nzambe, kasi ateki makoki na ye ya bokulutu mpo na ntina na politiki. Kaka ndenge lingomba esali lelo, ndenge Luther, Wesley, Pantekote, mpe etonga na bango mobimba, bateki yango mpo na kozua lokumu na ebongiseli na bango. Mose, na mitindo ya Nzambe; Balame, na mitindo ya Balake. Nzokande, basakoli nyonso mibale bazalaki bato babengami na Nzambe, mpe bango mibale bato ya molimo. Bótala bokeseni. Moko na moko azalaki na mokonzi: ya Mose ezalaki Nzambe, ya Balame ezalaki Balake.

¹⁰⁹ Bótala awa ndenge lolenge ya molimo esalemi, mpo na kotalisa polele ete oyo ya mokili ezali ya lokuta. Mose, atindami na Nzambe, na molongo ya mosala, akutani na mosakoli mosusu ya Nzambe mpe abeti na ye móndengé. Bokoki kokanisa yango! Mose, abengami na Nzambe, abongisami na Nzambe, atelimi na molongo ya mosala ya Nzambe; ayei epai ya etonga oyo ya malili mpe formaliste, mpe mosakoli mosusu ya Nzambe abeti na ye móndengé, oyo Nzambe asiláká kopambola mpe kobongisa. Okoyeba bokeseni ndenge nini? Bango mibale bazalaki na basakoli. Nzambe azalaki kosolola na basakoli nyonso mibale.

¹¹⁰ Mpe bamosusu na bango balobi: “Nzambe alobi: ‘Sala oyo *boye*.’ Nzambe alobi: ‘Sala oyo *kuna*.’” Sikawa, natii yango ntembe te, kasi ezali libanda na molongo ya Liloba na Nzambe. Mosakoli, etali te soki azali mosakoli, azali libanda na molongo. Bato mingi bapéngwisamaka ndenge wana. “Oh, ndeko *oyo* akoki kosala *boye*, mpe ndeko *oyo* akoki kosala *oyo kuna*,” mpe koboya Liloba?

¹¹¹ “Ata nalobi na minoko na bato mpe ya banje, ata nazali na makabo, na lolenge ete nakoki kolongola bangomba, ata napesi biloko na ngai nyonso mpo na koleisa babola, nazali kaka mpamba.”

“Bato mingi bakoya epai na Ngai na mokolo wana, mpe bakoloba: ‘Nkolo, Nkolo, nasakolaki na Nkombo na Yo te? Na Nkombo na Yo, nabenganaki milimo mabe mpe nasalaki misala na nguya te?’ Mpe Nakoloba na bango: ‘Bólongwa awa, bino. . . Bólongwa pene na Ngai, bino basali masumu na nko. Nayebi bino ata moke te.’” Nzokande, bayaki ná litatoli ete basalaki yango, kasi Yesu alobaki ete bazali basali masumu na nko. Lisumu na nko ezali nini? Ezali likambo oyo oyebi ete osengeli kosala yango, oyo ezali malamumu kosala yango, kasi ata bongo osali yango te. Bomoni ndenge ekozala na mikolo ya nsuka?

¹¹² Bóyoka molongo mobimba! Yango nde ntina oyo nazalaki kolanda na mpokwa oyo. Nalobaki ete nakosilisa na ngonga ya libwa, kasi nakosilisa mwa moke nsima na yango, ntango mosusu. Bótala, yango nde ntina mobimba oyo nazalaki kolanda,

kotalisa bino molongo yango, na nzela na Liloba na Nzambe, bomoni, ete—ete Nzambe asengeli kokokisa Liloba na Ye mpo Átikala Nzambe.

¹¹³ Sikawa, tomoni ete bango nyonso mibale bazalaki bato ya molimo, bango mibale bazalaki basakoli, bango mibale babengamáká. Mpe Mose, mpenza na molongo ya mosala, ná Likonzi na Móto mpenza liboso na ye mikolo nyonso, Molimo ya Nzambe likoló na ye, na molongo ya mosala. Tala mosali mosusu ya Nzambe ayei, abengami na Nzambe, abongisámi na Nzambe, mosakoli moko Liloba na Nzambe eyei epai na ye. Esika ya likama yango oyo. Moto moko te akokaki kowangana ete mobali yango azalaki ya Nzambe—ya Nzambe te, mpo Biblia elobi ete Molimo ya Nzambe ezalaki kosolola na ye, mpe azalaki mosakoli. Kasi, bomoni, ntango azuaki eyano ya solosolo kouta na Nzambe, alingaki kotosa Yango te. Amonaki Yango te, na nsima akendeki kobeta móndengé na Mose.

¹¹⁴ Sikawa, Balame alukaki mokano na Nzambe, na motema mobimba. Sikawa, ntango bato minene wana bayaki epai na ye mpe balobaki: “Balame! Mokonzi Balake moto abengisi yo, ete óya epai na ye sika-sikawa, mpe ólakela libota oyo ya Yisraele mabe, mpo batondi na mabelé mobimba, mpe sikawa batelemeli ngai. Mpe bakweisi bokonzi nyonso pembeni na bango, na nsé na bango. Sikawa tolingi ete óya kolakela mabe libota oyo. Mpamba te, nasosoli ete soki olakeli moto mabe, alakelamaka mabe.” Sikawa, bomoni, azalaki moto na Nzambe. “Oyo opambolaka, epambolamaka.” Azalaki mosali na Nzambe.

¹¹⁵ Mpe Balame sikawa, lokola mosakoli, akómaki kokanisa: “Ezali bobele na eloko moko mpo na ngai kosala, yango ezali nde koluka nini ezali mokano na Nzambe.”

¹¹⁶ Yango nde mosala ya mosakoli, soki abengámá kozala mosakoli. Liboso, mosakoli asengeli kosala nini? Ezali koluka mokano, Liloba na Nzambe. Asengeli kosala yango. Mpamba te, lokola mosakoli, Liloba na Nzambe eyaka epai na ye. Ba... Balobaka: “Ee, ozali theologien te.” Biblia elobi ata moke te ete Liloba na Nzambe eyaka epai ya theologien. Bazali baoyo babulunganisaka Yango. Liloba eyaka epai ya mosakoli na Nzambe.

¹¹⁷ Mpe tala awa mobali moko oyo azalaki mosakoli ya Nzambe. Mpe ntango bazuaki ye na mosala, basengelaki kozua ye na mosala, mpo áya kokende kolakela libota mosusu ya Nzambe mabe, bó тала, akendeki koluka mokano ya Nzambe. Mpe alingaki koyeba mokano mobongi be na Ye, mpe Nzambe apesaki ye mokano mobongi be na Ye na likambo yango. Mokano mobongi be na Ye epesamelaki ye. Mokano na Ye ezalaki nini? “Kokende te!” Yango nde Liloba ya liboso ya Nzambe. “Kokende elongo na bango te. Komeka kobundisa libota na Ngai te, oyo bazotamboláká na banzela ebongi be na Ngai.”

¹¹⁸ Ezali mpe bongo lelo, balingaka koswana, kowelana, mpe nyonso oyo mosusu, ntango bamonaka Molimo na Nzambe kosala katikati na bino. Mpe bazoluka ko, baluká yango mibu ebele, kofina Yango. Kasi koleka bazali koluka kofina Yango, koleka Ezali kokóla. Okoki kolakela mabe te oyo Nzambe apamboli. Okokoka na yo te. Okokoka na yo kosala yango te.

¹¹⁹ Boye, bomoni, wana ezalaki libota na Nzambe. Sikawa, mosakoli yango, ata akendeki kuna mpe mokonzi azuaki ye na mosala, asalaki mosala elongo na bato ya lokumu, mpe bongo na bongo. Mpe Liloba na Nzambe eyaki epai na ye. Alukaki mokano na Nzambe, mpe mokano na Nzambe eyanolaki ye, mpe elobaki: “Kolakela libota oyo mabe te. Nasílá kopambola bango.”

¹²⁰ Sikawa, ezali na theologien moko te na nsé ya mapata, oyo akoki kowangana ete Nsango oyo biso tozali koteya ete ezali mpenza Liloba na Nzambe te, oyo Eyei na ntango oyo ebongi. Nzambe atatolamaka na makambo nyonso oyo elobamaka to esalemaka, Asili kotalisa polele ete Ezali ya solo. Sikawa, theologien moko te, motangi moko te ya Biblia, mosakoli moko te, akoki kotala kati na Liloba yango, soki azali mosakoli, akomona likambo yango moko. Kasi soki amoni likambo yango moko te, wana elakisi ete mbeba moko ezali. Mpamba te. . .

¹²¹ Okoloba: “Ee, oh, nakoki kobalola yango.” Balake mpe, Balame. Bomoni? Kasi Nzambe atalisaki Mose.

Na bongo ndanga ezalaki nini? Liloba na Nzambe. Mpe ayokaki mokano na Nzambe ya polele mpenza: “Kokende te. Komeka ko—kolakela mabe te oyo Ngai nasílá kopambola. Bango bazali libota na Ngai.”

Kasi boyebi nini? Balame azalaki kosepela na bato yango te, mpo na kobanda. Oh, oyo nde. . . Ba-Balame boni batondi mpenza na mokili lelo! Azalaki kosepela na etonga yango te, mpo na kobanda.

¹²² Sikawa, nsima na ye koyoka mokano na Nzambe ya polele mpenza ete: “Kokende te,” kasi, bomoni, na esika ete ásala bongo, ezalaki ndenge moko lokola Kaina, lokola Kora, azalaki na zúwa, mpe a—azalaki koluka ntina moko mpo na kokende, ata bongo.

¹²³ Bótala, quartier général ya denomination na ye, nsima na ye kozongisa maloba kuna, alobaki: “Te, nandimi te ete nakokende kuna. Nandimi te ete nakozala na likambo na bango. Nakowelana na bato yango te, mpo Nzambe asili koyebisa ngai ete bazali libota na Ye, mpe nandimi te ete nakokende.” Soki átikalaka ata na yango!

Kasi, na nsé ya motema na ye, azalaki kosepela na bango te. Bomoni? Bazalaki bato ya etonga na ye te. Mpe nyonso oyo ezalaki kati na etonga na ye te “ezalaki malamú te, mpo na kobanda.” Bomoni? Mpe azalaki kotiola bango, koloba: “Ezali na mwa makambo ya somo oyo bato yango basalaki. Ya solo

mpenza, Nzambe ya bule akolakela libota ya ndenge wana mabe. Bazali—bazali bayinga. Batángá te lokola biso. Biso tozali libota ya mayele koleka. Oh, balobaka ete basalelaka Nzambe, kasi, bótala bango, bazali nini? Etonga ya, ee, etonga ya baombo, oyo bato ya kopota potopoto, oyo ba-Ezipito babengani kuna. Ee, Nzambe akoki kozala na ntina ya bato ya bosoto ndenge wana te!”

¹²⁴ Azángaki komona Libanga libetamá, ná nyoka ya motáko, Likonzi na Móto wana. Amekaki kosambisa bango na kotaleláká yango ndenge ya bomoto. Azángaki komona mbela ya likoló koleka ya Nzambe. Na ngolu, na koponama, bazalaki na molongo yango, mpe ná Liloba na Nzambe. Mpe ntango alingaki kolakela bango mabe, Nzambe alobaki: “Kosala yango te. Bazali ya Ngai. Tika bango kimia. Kosimba bango te.”

¹²⁵ Sikawa, na bongo mobali yango abalukaki mpe azongaki. Sikawa bótala quartier général ya dénomination na bango, nzokande, ntango azongaki. Batindaki etonga mosusu ya makasi koleka. Na mbala oyo, bakokaki kozala, na esika ete bázala bobele bandimi, basalaki ntango mosusu ete balakisi ya bonzambe nde báya mbala oyo. Bakokaki kozala ba-evéke, to ntango mosusu bakengeli bayángeli ya bitúka, mpo nyonso. . . Atindaki e—e—etonga ya makasi koleka, mpe e—etonga moko ya mwa makasi koleka, moto moko oyo atángaki mwa mingi koleka mpe oyo akokaki kotalisa ye mwango yango malamumu koleka, oyo akokaki kobanza malamumu.

¹²⁶ Bomoni, yango nde Kaina asalaki; abanzaki. Yango nde Kora asalaki; abanzaki. Ezali te likambo ya ye oyo abanzaka.

“Tozali kobwaka mabanzo.” Tondimelaka Nzambe, ata moto mosusu alobi nini. Bisu tondimelaka Nzambe. Tobanzaka te likambo oyo Nzambe alobi. Okoki kobanza na Yango te. Osengeli koyamba Yango na kondima. Mpe eloko nyonso oyo yo oyebi, ozali lisusu na ntina ya kobanza te. Nayebi te ndenge Asalaka yango; nandimi kaka ete Asalaka yango. Nayebi te ndenge nini Akokokisa elaka yango; kasi Alobaki ete Akosala yango. Ngai nandimi yango. Nayambi yango likoló na mobóko ete nandimi ete ezali Liloba na Nzambe.

Okoloba: “Ee, okoki kokendela na yango ndenge wana te.” Nayebi te ndenge nini nakokendela na yango, kasi Alobaki: “Loba yango.”

Namikaniseli ete mokengeli na ngai ya Batiste ayebisaki ngai, alobaki: “Ee, Billy, okoteya makonzi ya losambo. Ee, okanisi ete moto moko akoyoka likambo ya ndenge wana?”

Nalobaki: “Nzambe nde alobaki bongo.”

“Ndenge nini okokende, ná kelasi oyo osúká ya nsambo, kobondela mpo na bakonzi, mpe koteya na mokili mobimba?”

¹²⁷ Nalobaki: “Nayebi te ndenge nakosala yango, kasi, Ye nde alobaki bongo, mpe mpo na ngai, wana ekoki.” Bomoni? “Ye nde alobaki bongo. Nayebi te ndenge nini yango ekosalema.”

Alobaki: “Okanisi ete bato ya mokili oyo, oyo batángá mingi, ete yo okotelema bango, na likambo ya lobiko na nzoto kouta na Nzambe mpe bongo na bongo, okanisi ete bakondima yango?”

¹²⁸ Nalobaki: “Ezali likambo ngai ya koyeba soki bakondima Yango to te.” Nalobaki: “Lotómo na ngai ezali ya koteya Yango. Yango nde oyo Ayebisaki ngai. Alobaki ete Akozala elongo ná ngai, mpe Ayebisaki ngai ndenge ekosala.”

Mpe esalemi mpenza ndenge Alobaki ete ekosala. “Liboso, okosimba maboko na bango; na nsima ekosalema ete okoyeba ata basekelé ya mitema na bango.” Mpe nayebisaki bino yango, mpe esalemaki ndenge wana. Esalemaka ndenge nini? Kino lelo, nayebi te ndenge esalaka yango. Ezali likamabo na ngai te koyeba ndenge esalemaka; esalemaka kaka.

¹²⁹ Nani akokaki kolimbola, ntango Nzambe ayebisaki Eliya ete: “Kende kuna mpe fanda likoló na ngomba, mpe Nakoleisa yo. Napesi mitindo na—na biyanganga báleisa yo”? Ndenge nini eyanganga ekokaki kozua eteni ya lipa ná eteni—eteni ya mbisi, oyo bayitá, mpe komemela yango mosakoli? Eleki nyonso oyo nakoki kolimbola. Nandimi te ete bino bokoki kolimbola yango, to moto mosusu. Kasi Ye asalaki yango. Yango nde nyonso oyo esengelaki. Asalaki yango, mpe wana ezali solo ya likambo yango.

Asalaki yango ndenge nini, nayebi te; etali ngai te. Kasi Asalaki yango. Ndenge nini Akelaki mabelé, nayebi te; kasi Asalaki yango. Ndenge Atindaki Mwana na Ye, nayebi te; kasi Asalaki yango. Ndenge nini Asekwaki longwa na bakufi, nayebi te; kasi Asalaki yango. Ndenge nini Abikisaki ngai? Nayebi te; kasi Asalaki yango. Ya solo. Ndenge nini Abikisaki bino? Nakoki koyeba te; kasi Asalaki yango. Ndenge nini Abikisaki ngai na bokono? Nayebi te; kasi Asalaki yango. Alakaki ete Akosala yango, mpe Azali kokokisa Liloba na Ye.

Sikawa, Balame asengelaki koyeba yango, mpe ayebaki malamumu koleka.

¹³⁰ Bótala, etonga ya malamumu koleka, ya makasi koleka, bayaki, mpe balekaki na nini? Bazalaki na makabo ya malamumu koleka. Mpe kaka yango te, bakokaki kopesa ye mbongo mingi koleka, mpe bakokaki, kolaka ye esika ya lokumu koleka. “Sikawa, libanda na kozala kaka motei lokola bamosusu na ebongiseli, tokokómisa yo mokengeli mokonzi ya etuka. Omoni? Toko—tokosala likambo moko mpo na yo, soki obengani etonga ya bato wana, omoni, mpe soki opekisi yango.” Oh, balakaki ye esika ya lokumu monene. Alobaki: “Koleka okopambola. . .” Alobaki: “Oyebi, nazali na makoki ya komatisa yo lopete.” Bótala esika azalaki kozua maloba na ye, na mokonzi ya ekólo.

¹³¹ Mose azalaki kozua Maloba na ye wapi? Na Mokonzi ya Likoló. Moko ezalaki elaka ya Liloba na Nzambe: “Nakomema bino na mboka ya elaka, mpe moto moko te akotelema liboso na bino. Nakotinda banzoi liboso na bino mpo na kobengana bango, na bisika nyonso. Mpe bokozua mboka yango. Nasili kolak-. . . Nasili kopesa bino yango. Bókende liboso, bózua yango, bóbotola yango; ezali ya bino.” Sikawa, bomoni, Ye nde Mose azalaki koyoka. Kasi mobali yango azalaki koyoka kino ntango ekómaki eloko moko na motema na ye moko, ayokelaki yango zúwa, na bongo, na ntango yango nde akendeki epai ya mokonzi ya lingomba na bango. Bomoni?

¹³² Bótala, esika ya lokumu koleka. Alobaki: “Oyebi ete nazali na makoki ya komatisa yo lopete? Nakomatisa yo lopete na esika ya malamumu koleka. Nakosala mingi mpo na yo. Nakobakisa lifuti na yo. Nakopesa yo lifuti ya malamumu koeka.” Mpe ntango alakaki ye nyonso oyo, ebomaki ye miso.

¹³³ Ndenge ba-Balame bazali mingi na mokili lelo, oyo, mpo na esika ya malamumu koleka, mpo na losambo ya kitoko koleka, mpo na elaka ya eloko moko! Soki moto afungoli miso na ye na Liloba mpe na misala ya Nzambe. . . Mpe mobali malamumu yango, oyo azali na lokumu, akobanda lokola mosali na Nzambe, mpe azali na eyanganelo ya malamumu. Nsima na mwa ntango, libatizi ya Molimo Mosanto etalisami epai na ye; libatizi na Nkombo na Yesu etalisami epai na ye, oyo yango ezali Likomi mpe lolenge bobele moko ya kobatisa oyo elongobani na Makomi. Ntango etalisami epai na ye, mpe dénomination bayebi ete bakozanga ye, soki alandi yango, bakolaka ye esika ya malamumu koleka mpe bakotinda ye na losambo mosusu. Bomoni, bo-Balame ya kala, lisusu, kaka ndenge ezalaki na ebandeli.

¹³⁴ Sikawa, mobali oyo atángaka Biblia, akoki kotángá Yango te soki amoni te ete ezali Solo. Ata moto moko te atikálá kobatisama na bibiangelo ya “Tata, Mwana, Molimo Mosanto.” Ezali endimeli ya ba-Katoliko kasi Malakisi ya Biblia te. Ata moto moko te na Biblia atikálá kobatisama, to mibu nkama misato nsima na liwa ya ntóma ya nsuka, moto moko te abatizamaki libanda na Nkombo na Yesu Klisto. Lingomba Katoliko nde ebandaki yango, mpe baoyo batikali bayaki na likambo yango. Mpe motei nyonso oyo afandi na biró na ye mpe atali yango, ayebi ete ezali Solo, kasi mpo na lokumu, mpo na kobatela esika na ye, mpo bato bámona ye monene, azali kokakola.

“Ee,” okoloba, “Nzambe apambolaki ye.”

¹³⁵ Ya solo, bamosusu kati na bango bazali na makabo ya kobikisa babeli, bamosusu basalaka mayangani ya minene. Mpe ezali mbatá na bilongi na bango, mpe bazuaka eyano yango moko, uta na Liloba na Nzambe, oyo bino to moto mosusu nyonso

akoki kozua; Nzambe abongwanaka te. Bomoni oyo nalingi koloba?

¹³⁶ Balame, mpo na esika ya malamu koleka, akanisaki. Sikawa bótala, ntango bato ya lokumu koleka bayaki lisusu, oyo... Balame, awa, azuaki nkómá ya lokuta. Bomoni? Alobaki... Ntango ba—bato ya lokumu koleka bayaki lisusu, a—asengelaki koloba: “Bólongwa liboso na ngai! Nasilaki koyebisa bino Liloba na Nzambe. Bólonwa awa! Ezali YANGO ELOBI NKOLO.” Kasi, bomoni, makabo, mpe mpo na kozala moto ayebani koleka!

¹³⁷ Oh, basepelaka mpenza kosala bongo! “Tokotinda yo na mokili mobimba. Tokopesa yo mpepo mpo na yo moko. Tokosunga mayangani na yo na bisika nyonso, soki okoki bobele...” Oh, te. Ah-ha. Bomoni?

Toyebi oyo Liloba elobi. Toyebi oyo Nzambe alobaki. Tokokangama na yango, na lisungi ya Nzambe. Bomoni? Ata bolaki eloko nini, ata bobakisi lifuti ya koleka ndenge nini, mpe ata bo—botalisi makambo *oyo, oyo wana to oyo mosusu*; biso tolingi YANGO ELOBI NKOLO, mpe oyo Ye alobi *Awa* libso.

“Ee, lingomba elobaki: ‘Wana ezali na motuya mingi te.’”

Biso tolingi oyo Nzambe alobaki na ebandeli. “Mpe eloko nyonso oyo ebakisami likoló na Yango to elongolami na Yango, nkombo na yo nde ekolongolama na Buku ya Bomoi; kobakisa liloba moko likoló na Yango, to kolongola Liloba moko na Yango.” Bisu tolingi oyo Ye alobá; oyo lingomba elobá te, oyo Molakisi Jones alobá te, oyo moto mosusu alobá te. Tolingi oyo YANGO ELOBI NKOLO elobá, oyo Liloba elobá.

¹³⁸ Kasi sikawa tomoni Balame, mosali na Nzambe. Mpe mingi na bato yango babandaka, babongisámá na Nzambe, mpe bateyaka mpenza Liloba na Nzambe na makambo ebele; kasi na oyo etali Solo mobimba, bakosala yango te.

¹³⁹ Bótala awa, lokola mosakoli ya Nzambe, asengelaki komemama na etónge ya ndenge wana te, mpo na kobanda. Asengelaki kokende elongo na bango te. Kasi, bótala malamu, mpo na lokumu, bomoni, mpo lisosoli na ye ézala na kimia, alobaki: “Ee, bótikalala awa butu mobimba, nakomeka lisusu.” Bomoni: “Nakomeka lisusu”? Mpo na nini olingi komeka lisusu?

¹⁴⁰ Nzambe asilaki koyebisa ye likambo ya koloba. Nzambe alobaki: “Yebisa bango ete okokende te.” Yango nde Liloba na Ye ya ebandeli. “Nakokende te. ‘Mpe bókende te. Oyo Ngai napamboli, kolakela yango mabe te.’” Sikawa bótala ndenge ebalukelaki ye, nsima na mwa ntango. Bomoni? Mpe ekosalema bongo, mbala nyonso. Soki Nzambe alobi likambo, Alobi yango mpenza. Abongolaka makanisi na Ye te na ntina na yango. Atikalaka ná Liloba na Ye. Ata moto mosusu alobi nini, Atikalaka na Liloba yango.

¹⁴¹ Sikawa, Balame asengelaki koyeba yango malamumu. Asengelaki kobima na lisanga ya ndenge wana. Kasi makabo kitoko nyonso wana ná elaka oyo mokonzi apesaki ye, ete: “Oyebi ete nazali na makoki ya kosala yango. Ngai nde eveke. Nakoki kosala nyonso oyo nalingi, mpe nakomata yo lopete, soki oyei kosala yango mpo na ngai.”

Kasi Nzambe asilaki koyebisa ye: “Kosala yango te.”

¹⁴² Kasi ata bongo Balame alobaki: “Bótíkala awa butu mobimba, mpe nako—nakomeka lisusu.”

Bomoni, azalaki na Liloba. Ozali lisusu na ntina ya kowelana na ntina na Yango te. Nzambe asili koloba bongo. Ná etonga ya ndenge wana, bakobimisa yo ntango nyonso libanda na mokano na Nzambe, na maloba na bango, soki otiki bango.

¹⁴³ Ezali na etónge moko oyo bayaki epai ya mosakoli, mokolo moko, nkombo na ye Yobo. Bakokaki kondimisa ye te. Asiláká komona emononeli. Ayebaki nini ezalaki malamumu.

Balame amonaki emononeli, kasi ata bongo atikalaki ná Yango te.

¹⁴⁴ Ata bitónge ya lingomba na bango elobaki: “Oh, Yobo, osengelaki kosala *boye*, osengelaki kosala *bongo*.” Ata mwasi na ye, alobaki na ye: “Okómi koloba lokola moto ya liboma.” Bomoni? “Nayebi oyo Nkolo alobaki. Nayebi oyo Asengaki, mpe yango nde nasali.” Bomoni, atikalaki na oyo Nzambe asilaki koyebisa ye.

¹⁴⁵ Bótala, Balame asalelaki liteya ya lokuta oyo mpo na kosepelisa lisosoli na ye. Bomoni? Alobaki: “Ee, nako—nakotala likambo yango. Nakomeka lisusu.” Sikawa, wana nde esika oyo boyaka kozua oyo elandi na nsima. Tozali na ba-Balame boni na mpokwa oyo, baoyo balingaka kosalela Matai 28:19 lokola liteya ya lokuta bobele mpo na kosepelisa lisosoli na bango? Boni balingaka kosalela Malaki 4 mpo na kosepelisa lisosoli na bango? Boni balingaka kosalela Luka 17:30 kaka mpo na kosepelisa lisosoli? Boni balingaka kosalela makambo oyo, nzokande: “Ee, yoka, ngai na—nandimaka bazali na mobulu mpo na likambo Yango?”

¹⁴⁶ Na bongo, tala awa Balame azalaki koluka koloba: “Ekoki ntango mosusu kosalema ete Nzambe asangisaki makambo. Nakomeka lisusu, bomoni, nátala oyo Alobaki.” Sikawa, Ayebi motema na yo. Bótala, Balame asalelaki nkoma ya lokuta oyo mpo na kosepelisa lisosoli na ye moko, mpamba te, na bosolo, azalaki nde na mposa ya mbongo yango. Azalaki na mposa ya lokumu yango. Azalaki na mposa na yango. Azalaki na mposa ya mosala yango. Azalaki na mposa ya esika yango, mpo bato bámona ye monene, lokola Molakisi *Songolo-pakala*. Na bongo a—a—alobaki: “Nakomeka lisusu.”

147 Oh, na ba-Balame oyo bazali na mokili na mpokwa oyo, oyo balaki bango bisika, lokumu! Oh! la la! Bazali kolalisa lisosoli na bango na yango. Mpo na ba-denomination na bango, balobaka: “Soki osali *bongo*, tokobwaka yo libanda. Nayebi ete ozali moto malamumu, mpe tolingaka yo,” mpe azali moto malamumu, “tolingaka yo. Kasi okoki koteya yango te. Ma—mateyo na biso elobi ete okoki kosala yango te. Molakisi *Songolo-pakala* alobaki ete ezalaka nde boye. Sikawa osengeli kondima yango boye, soki otikali elongo na biso. Sikawa, soki olingi, nayebi ete olekaki na ntango ya mpasi, ee, nakotala soki nakoki komatisa yo lopete, ntango mosusu nakotinda yo na losambo mosusu.” Oh, yo Balame oyo! Na ntango oyebi mokano na Nzambe, sala yango! Nzambe akobongola makanisi na Ye te. Te.

148 Eloko oyo akokaki koleka pembeni na yango, Solo, mpo na etindá na ye. Alobaki: “Ee, nako—nakomeka lisusu.” Bótala ba-Balame oyo bazali.

149 Boye sikawa bómikanisela, ntango ayaki na butu ya mibale, ná lokumu monene wana, lisosoli na ye esilaki kolemba mpe kolala, Nzambe atikaki ye ákende. Sikawa, Nzambe abongolaki makanisi na Ye ata moke te, kasi Apesaki ye mokano na Ye ya ndingisa. “Sala yango kasi.” Kasi amonaki ekosimba te.

150 Nzambe ayebaki oyo ezalaki na motema ya Balame. Ata azalaki mosakoli, Nzambe ayebaki ete azalaki koyina batúntuki wana, mpe a—mpe a . . . a—alingaki kondima kolakela bango mabe, ata bongo. Mpe Nzambe asilaki koyebisa ye ete ásala yango te, kasi ata bongo ayaki lisusu, alingaki kosala yango, boye Nzambe atikaki ye ákende liboso. Nzambe alobaki: “Sala yango.” Sikawa, bómikanisela, Abongolaki makanisi na Ye ata moke te.

151 Bótala, azalaki na mposa ya kolakela bango mabe. Bato oyo azalaki kotánga lokola Libota ya ba-fanatíki, azalaki na mposa ya kolakela bango mabe. Azalaki na mposa ya esika. Alingaki kobebisa ntango elongo na bango te, na bongo akanisaki soki akokaki kosala mwa mosala oyo mpo na mokonzi, na bongo akomata lopete. Nzambe abongolaki makanisi na Ye to Liloba na Ye te.

Kasi Akopesa yo mposa ya motema na ye, ya motema na yo. Alakaki yango. Oyebi yango? Alakaki kopesa yo mposa ya mitema na yo. Mpe tika ete mposa na yo ézala Liloba na Nzambe. Tika ete mposa na yo ézala mokano na Ye, mokano na yo moko te. Mokano na Ye! Soki Ye . . . Soki osengi Ye eloko moko, kasi Apesi yo yango te, loba: “Natondi Yo, Nkolo. Yo nde oyebi oyo ezali malamumu.”

152 Bótala ata Mokonzi Hizikiya, ntango Atindaki mosakoli yango kuna epai na ye, Nzambe nde atindaki ye, Alobaki: “Tia ndako na yo na molongo. Olingi kokufa.”

Hizikiya abalolaki elongi na etutu mpe alalaki na mawa mpenza, alobaki: “Nkolo Nzambe, na—nasengi ete Ókanisa ngai. Natamboli liboso na Yo na motema oyo ebongi be. Nalingi ete Ótika ngai na bomoi mibu zomi na mitano lisusu.”

¹⁵³ “Malamu.” Nzambe asololaki na mosakoli, Alobaki: “Zonga koyebisa ye ete Nayoki ye.”

Kasi asalaki nini? Ayokisaki ekólo mobimba nsoni. Apelisaki nkanda ya Nzambe na lolenge ete Alingaki koboma ye. Ya solo. Boyebi yango. Azongaki nsima, mosika na Nzambe. Elingaki kozala malamumu mingi mpenza, mpo na ekólo, mpo na mokonzi ná bato nyonso, soki ákufaka mpe ándimaka likambo ya liboso oyo Nzambe abongisaki mpo na ye.

Kasi ekómaki likambo ya mpasi mpo na mosakoli, ntango mosakoli asengelaki kozonga mpe koyebisa ye Liloba na Nzambe, nsima na ye kosila koyebisa ye. Kasi Nzambe alobaki: “Sala yango.” Kasi, bomoni, ememaki nsoni.

¹⁵⁴ Balame asalaki nini? Nsima na ye koyeba mokano na Nzambe, nzokande atingamaki, alingaki kosala yango, ata bongo. Mpe esalaki nini? Bótala. Abongolaki likanisi na Ye ata moke te. Ayebaki oyo ezalaki na motema na ye.

¹⁵⁵ Boyebi, Tomás, mokolo moko akokaki kondima yango te. Te, a—alobaki: “Te, nakoki kondima yango te. Soki nakokaki kokamata loboko na ngai mpe kotia yango na mopanzi na Ye, kotia yango esika banséte etobolaki loboko na Ye, ee, nde, nde nako—nakondima yango na ntango wana.”

Alobaki: “Yaka awa, Tomás. Bomoni? Sikawa tia maboko na yo awa boye.”

Sikawa, oh, Tomás alobaki sikawa: “Ezali Nkolo na ngai mpe Nzambe na ngai.”

¹⁵⁶ Alobaki: “Iyo, omoni, sikawa ondimi yango. Libonza boni ya baoyo bamoni te kasi bandimi ekoleka monene!”

Ntango mosusu bato balingaka koyamba Molimo Mosanto te, soki balobi minoko na sika te. Nandimaka minoko na sika, ya solo. Azali Nzambe malamumu; Akopesa yo mposa ya motema na yo. Kasi ata olobi minoko na sika ndenge nini, kasi soki oboi Liloba oyo, ozali na libunga, ata bongo. Bomoni? Bomoni, okokota te mpo olobaka minoko na sika. Okokota mpo otosi Liloba moko na moko. Yango nde ndanga ya Molimo Mosanto, ntango ondimi Liloba na Nzambe. Bomoni?

¹⁵⁷ Nandimaka minoko na sika. Nandimaka ete okoki kopesamela bomoi, ndenge nalobaki na ntongo ya lelo, na lolenge ete okoloba minoko na sika. Ngai moko nalobá yango, mpe nayebi ete ezali Solo. Nayebi ete ezali solo. Kasi yango nde elembo te, ete ozali mwana na Nzambe oyo aponámá. Bomoni? Te, ata moke te. Alobaki te. . .

“Mingi bakoya epai na Ngai mpe bakoloba: ‘Nkolo, nasakolaki mpe nasalaki makambo minene nyonso wana na Nkombo na Yo te?’ Akoloba: ‘Bólongwa pene na Ngai, bino bato na masumu na nko, Nayebi bino ata moke te.’”

¹⁵⁸ Olobaka minoko na sika, na nsima oboi kobatisama na Nkombo na Yesu Klisto? Mbeba moko ezali na esika moko. Iyo, ya solo; makambo nyonso wana, mitindo nyonso oyo Nzambe apésá. Mbeba moko ezali. Lukaluka kaka kati na lisosoli na yo moko, mpe tala oyo—tala oyo Biblia elobá. Bólakisa ngai esika moko oyo moto moko abatisamaki na nkombo ya “Tata, Mwana, Molimo Mosanto.” Bomoni? Ezali kuna te. Kasi, bomoni, mbala mosusu mpo na kosepelisa lisosoli na bino, bolobaka: “Ee. . .”

Olobaka: “Nzambe ayebisi basi ndenge basengeli kosala, ete bálata kupé mpe nyonso wana te, kasi, oyebi, mokengeli alobaki. . .” Na bongo balandaka nzela ya petee.

¹⁵⁹ Bayebi oyo Nzambe alobi na ntina na yango Awa. Bomoni? Ya solo, Nzambe nde alobi bongo.

Boye, ba—ba—balingaka kosala yango, ata bongo, bomoni. Balukaka komilongisa. “Ee, namoni ete ezali malamau koleka. Ezali—ezali te. . . Mopepe ezali kopepa te. . .” Iyo.

Kasi Nzambe alobi ete mobali álata lokola mwasi te. “Soki mwasi alati elamba ya mobali, ezali mbindo na miso na Ye.” Boye ezali malamau te, iyo, mpe bosengelaki kosala yango te. Te. Bomoni? Boye, na yango, ezali mabe.

¹⁶⁰ Kasi, bomoni, balukaka komilongisa, ete: “Nkolo nde ayebisaki ngai ete násala boye.” Nalobi te ete Alobaki bongo te, kasi, tala, ezali mokano mobongi be na Ye te. Esengeli kozala mokano na Ye ya ndingisa. Bomoni ndenge ekosala? Ekobebisa etonga mobimba. Ebebisaki moláko mobimba.

¹⁶¹ Bótala awa, Nzambe abongolaki makanisi na Ye, Liloba na Ye, ata moke te. Kasi Azali Nzambe malamau, mpe Akopesa yo mposa ya motema na yo, atako etelemeli mokano na Ye. Bondimi yango?

Bótala, Nzambe alobaki na Mose: “Kende kuna,” mosakoli oyo apakólami. Alobaki: “Kende kuna mpe loba na libanga yango.” Esilaki kobétama.

¹⁶² Mose akendekei kuna na nkanda na ye, azuaki lingenda, mpe alobaki: “Bino batomboki, tosengeli kobimisela bino mai na libanga oyo?” mpe abetaki libanga. Mai ebimaki te. Abetaki yango lisusu; ebimaki. Etelemelaki mokano na Nzambe. Ebukaki mwango mobimba ya Biblia; Klisto asengelaki kobétama mbala ya mibale. Bomoni? Klisto abetamaki mbala moko. Ebukaki mwango mobimba. Kasi Apesaki ye mwango na Ye ya ndingisa. Bongo, na nsima, alobaki: “Bomoni, topesi bino mai. Iyo, ngai moto nabimiseli bino yango, bino batomboki oyo!”

163 Nzambe alobaki: “Yaka awa, Mose. Yaka awa. Mata na likoló awa . . . Ozalaka mosali ya sembo.” (Lokola mwasi oyo alati sapato ya talon molai: “Omataki,” bomoni.) “Tala kuna. Omoni mboka ya elaka?”

“E Nkolo!”

“Kasi yo okokóma kuna te. Ozuaki mokano na Ngai ya ndingisa, kuna na Libanga. Omikumisaki yo moko, omoni, kasi Ngai te. Omibulisaki yo moko. Obulisaki Ngai te. Otosaki Liloba na Ngai ya ebandeli te, oyo Nayebisaki yo kosala.” Nzokande, mai ebimaki.

Okoki kotielala babeli maboko mpe babiki. Okoki kosakola, to koloba minoko na sika. Kasi, likambo ezali ete ótosa Liloba na Ye ya ebandeli! Nzambe abongolaka makanisi na Ye te, moninga. Osengeli kotosa etinda na Ye, mokano na Ye.

“Oh, ee, oyo wana ezalaki mpo na bayekoli.”

164 Abongwanaka te. Soki Azali naino na moyekoli moko, yango nde etinda yango moko. “Bókende na mokili mobimba mpe bóteya Nsango-malamu. Bilembo oyo ekolanda baoyo bakondima.” Ebongwani ata moke te. Akoki kobongwana te.

Sikawa, okoki koloba: “Ee, yoka, ezali mpo na eleko oyo te.” Oh, yo moto ya Balame oyo! Bomoni? Bomoni, Nzambe abongwanaka te. Azali ndenge moko lobi, lelo, mpe libela.

165 Bótala bato ya Balame ya lelo. “Oh, nayebi ete na Biblia bazalaki kobatisa na Nkombo na Yesu, kasi, tala, bato nyonso . . .”

Etali ngai te oyo bato basali. “Nkombo mosusu ezali te na nsé ya Lola oyo epesami na bato, oyo bakoki kobikisama na nzela na yango.” “Bolimbisi ya masumu ezali te, kaka na Nkombo na Yesu Klisto.” Ézala nini, ózala malamú ndenge nini, oyo osalaka, etali yango ata moke te. Liloba na Nzambe ya ebandeli nde; osengeli kokangama na Yango. Fiuu! Malamu.

166 “Botosi ya Liloba na Ye eleki mbeka.” Bozali komikanisela ntango oyo Saulo azongaki.

167 Balame azalaki na likabo ya kondima mpe akokaki kosalela yango na Liloba na Nzambe libongi be, ya ebandeli.

Bato mingi na elanga lelo, ná makabo ya kobikisa babeli, bakokaki kosala ndenge moko. Bato mingi awa, bato oyo balobaka minoko na sika, bato oyo basakolaka, likabo moko oyo, bakokaki kosalela yango mpo na Bokonzi na Nzambe, kasi basalaka yango te. Bazuaka . . . Mpe Nzambe apambolaka bango, ata bongo, bazuaka mokano ya ndingisa. Kasi mpo na lokumu, bisengo mpe matómba na bango moko, bateki makoki na bango ya bokulutu, lokola Esau, bomoni, bamikabi mobimba na ebongiseli. Bamiteki mobimba, lokola Balame. Bomoni?

Bato mingi bazali kosala ndenge moko lelo. Toyebi ete ezali ya solo. Bazali koteka makoki na bango ya bokulutu. Hah! Basi bazolobáká ete bazali na Molimo Mosanto, bazolátáká ba-kupé; mibali bazopesáká bango nzela ya komata na bitumbelo, basi bakátá suki komatáká na bitumbelo; ná makiyáje na elongi, balati nzambala ya basambeli. Yango nde libanga ya libaku na monene koleka nyonso oyo lingomba ekutáná na yango.

¹⁶⁸ Na oyo etali makónzi ya politíki, soki olingi koyeba ntango oyo tokómi na eleko ya bokonzi, tala epai Bayuda bakómi. Bótala ndenge Bayuda bakómi, mpamba te bakómi ekólo. Soki olingi koyeba esika bikólo ekómi, ótala Bayuda.

Soki olingi koyeba esika nini lingomba eteleme, tala basi. Tala bomoto ya basi, mpo mwasi azali elilingi ya lingomba. Soki omoni mbindo epai na basi, okomona mbindo kati na lingomba. Ndenge akómi, Yezabele moko oyo apakoli makiyáje na elongi, lingomba mpe ekómi mpenza ndenge wana. Bomoni? Sikawa, ezali ya solo, mpe boyebi yango. Bomoni? Soki olingi koyeba esika lingomba ekómi, tala bomoto ya basi na bino. Mpamba te, azali, lingomba ezali mwasi.

Soki olingi koyeba ndenge ekólo ekómi, tala Bayuda.

¹⁶⁹ Bótala, ndenge Nzambe alobaki na Balame, nsima na ye koyoka mokano ya polele, Liloba: “Kokende te.” Iyo, na nsima Ayebisaki ye, nsima na Ye komona, kati na ye—kati na motema na ye, oyo asengelaki kosala; Apesaki ye mokano na Ye ya ndingisa, na bongo Alobaki: “Kende.”

¹⁷⁰ Mpe bokoki kosala ndenge moko. Soki olingi kotambola kati na Solo te, okoki kokóba na yo mpe kozala na—kozala na lotomo ya monene. Ya solo, okoki na yo. Kasi ozozua nde mokano na Ye ya ndingisa. Ozoniata nde Liloba na Ye. Akofúlukisa yo, ya solo. Li . . .

Kaka ndenge Asalaki mpo na Balame. Afúlukaki, kasi akokaki kolakela bato wana mabe te. Akokaki kosala yango te. Mpamba te, mbala nyonso abandaki kolaka mabe, azalaki kopambola. Bomoni, akokaki kosala yango te. Kasi na ntango ekómaki ete áfuluka kati na mosala na ye, ateyaki bato yango, na nzela na Balake, ete básala ekobo. Amemaki moláko ya Yisraele bákota mpe bábalana, alobaki: “Ee, biso nyonso tozali moko. Ee, bokumbamelaka Nzambe yango moko. Tozali na mosakoli moko awa, bino mpe bozali na mosakoli moko kuna. Mpe tozali na mbeka ndenge moko, Jehovah moko lokola batata na biso. Sikawa, mpo na nini bino nyonso bóya kosangana na biso te?”

Biblia elobi: “Bósangana na bazangi kondima te. Bólata ekanganelo moko ná bango te, ata moke te. Soki bandimi Yango te, bózala mosika na bango.” Bomoni? “Bóbima, bókabwana,” elobi Nkolo, “mpe Nakoyamba bino.” Bomoni? “Bósimba biloko na bango ya mbindo te.” Ya solo. Mbindo na bango liboso na

Liloba, ná makambo ya ndenge wana, bózala mosika na yango. Bóyoka yango te.

¹⁷¹ Mpe awa tomoni ete Balame akendeki kuna mpe abandaki koteya bato, kasi azalaki na libunga. Mpe a—alandaki nzela ya Balame, ndenge asalaki, mpe ateyaki Balake, mpe bana ya Yisraele basalaki ekobo. Mpe malali ebetaki ekólo to bato ya Yisraele, mpe bato nkóto na nkóto bakufaki na mokolo moko.

Mpe wana bango nyonso bazalaki kobondela kuna, liboso na etumbelo ya Nzambe, mobali moko ya Yisraele ayaki ná mwasi moko ya Madiani, mwasi ya denomination moko, mpe bakotaki na hema. Mpe mwana ya nganganzambe apusanaki wana, azwaki likonga mpe abomaki bango mibale. Yango nde ekangaki nkanda ya Nzambe. Boyebi ete ezali Likomi. Ezali solo? Bomoni?

¹⁷² Kasi likambo nini esalemaki? Balame, alongaki na kolembisa Yisraele. Asalaki nini? Alembisaki moláko na bango. Nzambe atikaki ete ákende kolembisa molako na bango, mpe ebebisaki molako mobimba.

Mpe soki malakisi moko ebandi, oyo ezali Solo ya Biblia te, ebebisaka moláko mobimba. Soki moto moko atele mi ná likanisi mosusu, lokola Kora, mpe alobi: “Ee, na likambo *oyo, oyo wana* mpe *oyo mosusu*, ngai nazali na likanisi mosusu,” ebebisaka moláko mobimba. Mpe yango nde ekómeli molako mobimba ya lingomba lelo. Ya solo.

¹⁷³ Kolakisáká ndenge asalaki, kolembisáká molako mobimba mpo na Kades-Barnea, etumba ya Liloba. Ntango bakómaki na Kades-Barnea, na bongo, kolembisama ya moláko esalemaki. Bazongaki. Bakendeki kuna nsima na . . .

Bómikanisela, baliáki bilei ya banje. Bazalaki na Liloba na Nzambe litalisami, mpokwa nyonso. Mpe baliaki bilei yango. Bamelaki mai kouta na libanga. Bango nyonso, bamonaki bikamwa. Bamonaki Mose, bamonaki liloba na ye, bamonaki masakoli na ye, nyonso wana.

Na bongo sukasuka ntango bayokaki molakisi ya lokuta wana, kokóta katikati na bango mpe koteya malakisi ya lokuta, alembisaki molako, mpe afulukaki na nzela na yango.

Ekoki kozala ete atongaki ba-ndakonzambe ya ba-milió ya ba-dollar. ekoki kozala ete azalaki na ba-denomination ya minene. Ekoki kozala ete abakisaki bato nkóto na nkóto, mpe asalaki misala minene, misala ya nguya, mpe azalaki mosakoli. Ezali mabe te, kasi, na ntango oyo elongobani na Liloba na Nzambe te, malamú ózala mosika na yango.

Nzambe abongolaka makanisi na Ye te. Kangama na Liloba na Ye, mpo yango nde ekomonana na nsuka, Liloba, Liloba nsima na Liloba. “Moto oyo akolongola Liloba moko na Yango,

to akobakisa liloba moko na Yango!” Esengeli kotikala bongo, Liloba yango.

¹⁷⁴ Sikawa boyoka na bokebi sika. Ntango momekano ya Liloba eyaki, ntango bakatisaki mpe bamonaki bongúná ezalaki mpenza makasi, bongúná ya makasi koleka nyonso oyo batikálá komona, Ba-amaleke balekaki—balekaki bango na bonene mbala zomi. Balobaki: “Tozali lokola mayoyo. Bitutu na bango, to bingumba na bango ezingámá na bitutu ya minene na lolenge ete bakoki kosala mimekano ya bopoti mbangu na makalo likoló na yango, makalo mibale, na mbangu nyonso, zongazonga na bitutu yango, bomoni, ya bingumba na bango. Ee, makonga na bango ezali mpenza minene, ezali milai. Mpe bazali bingambe. Ee, biso tozali lokola mayoyo. Tokokoka kosala yango te.”

Mpe mibali mibale bakangamaki na Liloba yango, Kalebe ná Yosua, balobaki: “Bózela naino! Bino ba-milió mibale bókanga naino minoko. Tozali na makoki koleka ya kosala yango. Bomoni, tozali na makoki koleka ya kobunda na bango.”

Batelemaki likoló na nini? Nzambe alobaki: “Napesi bino mboka yango. Ezali ya bino.” Mpe batelemaki likoló na yango. Kasi bato basilaki kobalana, kati na makambo mosusu, ná bindimeli mpe mimesano ya ndenge na ndenge kati na bango, mpe bakómaki na bolembu mingi, na botaú mingi, bayebaki te ngambo nini kobaluka, mpe eloko nini kosala. Ya solo. Wana nde momekano ya Liloba eyaki.

¹⁷⁵ Ata bongo, Akopesa yo ndingisa ya kosala yango, kopesa mokano na yo nzela, mokano ya ndingisa, koyebáká ete. . . Oyo ezali na motema na yo, Ayebi yango.

Okoloba: “Ee, Ndeko Branham, nasalaka *boye-na-boye*. Ekotungisa ngai te. Nzambe apambolaka ngai mikolo nyonso. Nayembaka na Molimo. Nabinaka na Molimo. Na. . .” Akopesa yango nzela. Kende liboso. Ya solo. Kasi okosala nini?

¹⁷⁶ “Nalataka ba-kupé, mpe nasalaka *boye*. Ekotungisa ngai te. Nayebi ete kondima na ngai ezali kati na Klisto, kati na oyo nazolata te.”

Kasi, Biblia elobi ete likambo moko ezali. Bomoni? Okosala nini? Okotia libanga ya libaku, ndenge Balame asalaki, liboso na basi mosusu nyonso. Bokosala nini mpo na bilenge bana basi na bino? Bokozala na etonga ya ba-Ricketta, ya solo mpenza, etonga moke ya ba-Yezabele ya bilongi bapakólá-pakólá. Bomoni?

¹⁷⁷ Kasi Nzambe akofúlukisa yo. “Ee, Apambolaka ngai.” Natii yango ntembe te. Apambolaki mpe Balame. Bomoni? Na ntembe te Akosala yango. Ozali kotambola kati na mokano na Ye ya ndingisa, na mokano mobongi be na Ye te. Nzambe abongoli makanisi na Ye te, mpo Apamboli yo.

Apambolaki Yisraele kuna na mibu ntuku minei. Basalaki nini? Babalaki basi, babokolaki mabota, bayambaki bana,

bafutaki moko na zomi na bango, bafandaki kuna. Mpe Nzambe apambolaki bango na lisobe, aleisaki bango mána, mpe bongo na bongo. Kasi moko na moko na bango akufaki, mpo babatelaki ata moke te mokano na Ye ya ebandeli, ya ndingisa . . . mokano na Ye ya ebandeli, Liloba na Ye. Bakamataki nde nzela na Ye ya ndingisa.

¹⁷⁸ Koba na yo, kasi, kobosana te, ntango balongwaki na Kades, bakendeki lisusu mosika te na mobembo na bango. Bakómaki kaka kozunguluka-zunguluka na kati ya lisobe. Na esika oyo, bakokaki kobima, mpe mikolo mibale nsima na yango, bakokaki kozala kati na mboka ya elaka. Basalaki mobembo ya mibu ntuku minei, mpe bango nyonso bakufaki, longola kaka Yosua ná Kalebe, baoyo bakangamaki na Liloba ya ebandeli.

¹⁷⁹ E Nzambe, sunga biso. Nzambe abongolaka mokano na Ye te. Abongolaka makanisi na Ye te, kasi Akopambola yo.

Ya solo, Apambolaki Balame. Mpe asalaki nini kuna? Abebisaki moláko mobimba. Bomoni, bosengeli kotikala na oyo Alobaki. Abongolaki ata moke te mwango na Ye ya ebandeli.

¹⁸⁰ Sikawa bótala naino ba-Balame, na elanga lelo. Bótala zinga-zinga. Bazofuluka, bazolobáká minoko na sika, ya solo, bazosaleláká likabo ya Nzambe mpo na kozua litomba, ya ndenge na ndenge, ya solo. Kasi ezali kobebisa lingomba mobimba ya Nzambe na malakisi na bango oyo ebéba. Ya solo.

Moto moko alobaki na ngai, alobaki: “Mpo na nini ozosala oyo? Mpo na nini ozosala oyo *wana*?”

Nalobaki: “Ondimi te ete Yango ezali Solo?”

¹⁸¹ “Oh, iyo. Kasi,” alobaki, “oyebi nini? Etali yo te. Yo osengeli kobondela mpo na babeli. Bandimaka ete ozali mosakoli. Ee, okokaki kolakisa basi yango ndenge ya ko, mpe mibali yango, ndenge ya kosala oyo, oyo *wana* mpe oyo *mosusu*.”

“Ndenge nini okoki kolakisa bango algebre na ntango oyo balingi ata koyekola ABC te? Hah? Hah? Ndenge nini okoki kolakisa bango makambo yango, na ntango oyo balingi ata koyekola makambo ya ebandeli te?” Bomoni? Osengeli kozonga nsima mpo na kobandela epai obandaki, to epai otikaki, mpe kozua Liloba na Nzambe nyonso.

¹⁸² Bótala ndenge ekómi na bilanga ya koteya lelo. Ndenge Balame abalisi na kati ya lingomba ya Nzambe, mwasi ya ndumba, abalisi mwasi ya ndumba na kati ya lingomba ya Nzambe, ndenge moko mpe balakisi ya lokuta oyo lelo bazali koluka koyebisa bino. Bakobálisa bibongiseli nyonso ná bato nyonso mpe bakokotisa bango kati na mwasi ya ndumba ya Emoniseli 17. Malakisi na bango ya Balame ezali kotambola lelo, mpe balobaka: “Tozali bobele ndenge moko. Bisó nyonso tozali Baklisto.” Mpe ba-sángo, ba-pápa ná bamosusu, bango nyonso bazali kokakola mpe kosala yango.

¹⁸³ Motei alobaki. . . Nayebi ata motei moko ya Pantekotiste, bango nyonso, bakómi kokabola lipa kascher ya libungutulu. Elingi koloba, *Ashtoreth*, “nzambe sanza,” ostía ya kascher. Bakómi koloba: “Kanga miso mpe lia yango, soki ezokisi lisosoli na yo.” Kanga miso? Ostía ya libungutulu, elakisi nini? Toliaka nzoto oyo ebukamaki, Yesu Klisto, oyo abukamaki; nzambe sanza moko ya libungutulu te, *Ashtoreth*, oyo Maria azuá esika na Ye. Mpe lipa kascher ya ba-Roma ezali ntango nyonso ya libungutulu, mpo na kotalisa nzambe sanza, nzambe mwasi, nzambe te. Tozali na lipa kascher oyo ebukamaki, ya solo. Oh!

¹⁸⁴ Boye sikawa, mwasi ya ndumba monene ya Emoniseli 17, balakisi ya Balame yango, ná malakisi na bango ya lokuta, bazali kobalisa lingomba mpe kokotisa yango na mobulungano ya ndenge wana. Bótala malamú ntango ekómaka na ntango ya kosukisa likambo na ntango ya nsuka, bótala bolembu na yango sikawa. Nkama libwa ná ba-ntúku ya bibongiseli oyo ekeseni, moko ebendi na ngámbo moko, mosusu na ngámbo mosusu. Bomoko ezali te kati na bango. Mpe bazoluka kosala bomoko; oyo esimbami na Liloba na Nzambe te, na mwango ya Nzambe te, oyo ya ebandeli. Bazali kokotisa yango na nzela na politiki mpe na ebongiseli.

Nzambe abongolaka makanisi na Ye te. Atikalaka mpenza na Liloba na Ye. Alobaki: “Likoló mpe nse ekoleka, kasi Liloba na Ngai ekoleka te.” Ezali ya solo. Atikalaka na Liloba na Ye ya ebandeli. Oh! la la!

¹⁸⁵ Ata bazali kokoba kobanza makambo oyo etelemelaka Yango, kaka ndenge bango basaláká, mpe. . . Likambo ya kosala ezali bobele moko. Ye akobongola Yango te. Ndima kaka. Mpamba te, likoló ná nse ekoleka; Liloba na Ye ekokweya ata moke te. Bomoni?

¹⁸⁶ Bomoni epai wapi bazokotisa yo na kati yango? Bomoni politiki ná makambo mosusu, ndenge bazali koluka kosangisa lingomba na nzela na politiki kati na lingomba? Tosanganaka na Klisto na nzela na politiki te.

Tosanganaka na Lingomba, na Klisto, na nzela na libatisi ya Molimo Mosanto. Mpe lolenge mpo na yo koyeba libatisi ya Molimo Mosanto, ezali mpo Molimo wana oyo ezali kati na yo etalisaka ete Liloba na Nzambe mobimba ezali Solo. Ya solo. “Mpo moto nyonso akolongola Liloba moko na Yango, to akobakisa liloba moko na Yango, likabo na ye ekolongolama na Buku na Bomoi.”

¹⁸⁷ Nzokande bolobaka: “Azali kofuluka.” Bokoki kondima Yango na nzela na bofuluki te. Bokoki koloba te ete ezali Nzambe na nzela na bofuluki. Mokili ezali kofuluka. Balame afulukaki na nzela na yango.

Kasi, ndeko, bayebaka ete ezali Nzambe na nzela na Liloba na Ye. Akokisaka Liloba na Ye mpe Atalisaka ete Ezali Solo.

Boye, kobosana te, moninga, na ntango nyonso oyo ozali na bomoi, kobosana likambo oyo ata moke te: Nzambe abongolaka makanisi na Ye te. Ata bongo, Akopambola. Akotika yo ólanda mokano na Ye ya ndingisa, kasi Akobongola makanisi na Ye te. Akobongola mwango na Ye te. Akobongola Liloba na Ye te, mpo na yo. Te, misie.

Yo nde osengeli kobongwana. Okoki komema Liloba na Nzambe ékokana na bíkélá na yo te; osengeli nde komema bíkélá na yo ékokana na Liloba na Nzambe. Bomoni? Ndenge wana nde osengeli . . .

Okoloba: “Ee, nazali moto malamú. Nzambe asalaka *oyo*, *oyo wana* to *oyo mosusu*.” Kasi yo otósaka Liloba na Ye? “Oh, ee, yoka, ezali kaka te. . . Te.” Malamú, mbeba moko ezali esika moko. Nzambe ako . . . Iyo, Akofúlukisa yo. Na ntembe te, Akokómisa yo. . .

¹⁸⁸ Ba-dénomination ezali kofuluka na ndenge ya moko ya nsomo! Bazali kofungola bahéma na bango, ba-losambo minene mpe kitoko, ná nyonso wana, na ekólo mobimba. Bazali bazui, mbongo ezali kosopana, mpe bandimi bazali kouta bipai na bipai. Biblia elobi: “Bakuti kati na mwasi yango, ata bozui ya mokili, ná milimo ya bato mpe,” mpe biloko ya ndenge na ndenge oyo bakutaki na kati ya mwasi ya ndumba yango, oyo azali mama ya nyonso wana, ya politiki mpe ya ebongiseli, boye te?

¹⁸⁹ Kasi etóngá moke ya Nzambe ezali Mwasi na libala na Ye, oyo ateleme na katikati mpenza ya Liloba yango. Tika ete molingami Nzambe ya Lola ásala ete bótelema ngwi kaka wana. Bómeka ata moke te kolongwa na Liloba wana.

Bokoki kopambola, bokoki . . . Nzambe akoki kobikisa bokono na yo. Akoki kobikisa bebé na yo. Akoki kobikisa mobali na yo, mwasi na yo. Akoki kobikisa mama na yo, to moto mosusu. Okoki kopumbwa na Molimo na Ye, mpe kobina-bina.

Kobosana te, mbula enokaka likoló na bato malamú ná bato mabe, ndenge moko. Kasi soki momboto yango ezali kuna, to ebongisámá liboso, to ebongisámá liboso te. Mpe soki ebongisámá liboso, ekoki . . . Soki ezali blé, esengeli kobota blé. Soki ezali Liloba na Nzambe, esengeli kobota Liloba na Nzambe. Soki te, ee, boye ezali bongo te. Bomoni? Bososoli yango sikawa?

¹⁹⁰ Nkolo ápambola bino. Bótala, nayebisaki bino ete nalingaki kosilisa na ngonga ya ntuku mibale na moko, sikawa etikali miniti ntuku mibale liboso na ngonga ya ntuku mibale na mibale. Mingi kati na bino bazali na nzela molai ya kokende. Nalingi bino. Mpe ntina oyo naumisi bino boye, ezali te mpo nalingi kozala motema mabe epai na bino, kasi mpo nalingi bino. Mpe oyo nayebi, nabombaka eloko moko te; nayebisaka bino Solo.

¹⁹¹ Kuna na mayangani epai nakendeke, boyokaka ngai koteya Mateya oyo te. Te, nalakaki bino ete nakoya na tabernacle oyo. Uta awa nde nateyaka Mateya na ngai. Nazali na misato to minei

mosusu awa, oyo Nkolo auti kopesa ngai, nasili kozua Makomi mpo na yango, nakoki komeka koteya yango na bisika mosusu te, kaka awa. Uta awa nde Liloba na Nzambe ebandaki kobima. Mpe, soki Nzambe abongoli yango te, nakotikala kaka awa mpe nakoteya yango kaka awa. Ya solo.

Kuna na mayangani yango, nabondelaka mpo na babeli, mpe nasalaka makambo nyonso ndenge wana; mpe, na bisika mosusu, nalobaka makambo na ndenge ya kozunguluka, mpo bampate báyoka yango. Bayebaka oyo elobamaka. Na elobeli mosusu, ezalaka kaka mpambo likoló na ndóbo, bomoni. Natalisaka bilembo oyo—oyo emekaka kotalisa ete Nzambe nde ayebi, na lisosoli ya makanisi, Ayebaka mitema ya bato, mpe Asalaka makambo yango. Oyo wana ezali likabo ya kopalanganisa Nsango-malamu, kaka mpo na kolamusa bato.

Na mbala moko, bande moko ekiti na ndako na bango. Na ntango wana, likambo esalemi. Soki azali mpate, akosangana ná yango mbala moko. Soki azali ntaba, akobwaka bande yango libanda. Ah-ha. [Ndeko Ben Bryan alobi: “Na yo mpe.”—Mok.] Bomoni, ezali. . . “Na yo mpe,” ezali ya solo, Ben. Ezali mpenza ya solo. Ben abikelaki likambo moko. Malamu. Ee, ya solo.

¹⁹² Bozali na esengo ndenge bozali ya Ye, boye te? Bozali na esengo, boye te? Tozaláká koyemba mwa loyembo moko ya ba-Pantekotiste, kala, etc:

Nazali na esengo mingi ndenge Nkolo abimísá ngai;

Nazali na esengo mingi ndenge Nkolo abimísá ngai;

Soki Yesu te, nalingaki kozala wapi?

Nazali na esengo mingi ndenge Nkolo abimísá ngai.

Oh, nakóma na esengo uta Nkolo abimísá ngai;

Nakómá na esengo uta Nkolo abimísá ngai;

Soki Yesu te, nalingaki kozala wapi?

Nazali na esengo mingi uta Nkolo abimísá ngai.

Nakómá koganga uta Nkolo abimísá ngai;

Nakómá koganga uta Nkolo abimísá ngai;

Soki Yesu te, oh, nalingaki kozala wapi?

Nazali na esengo mingi ndenge Nkolo abimísá ngai.

Nkembo! Bozali na esengo, boye te?

Ozali na esengo. . .

Tóyemba yango.

Ozali na esengo te ndenge Nkolo abimísá yo?

Ozali na esengo te ndenge Nkolo abimísá yo?

Soki Yesu te, oh, nalingaki kozala wapi?

Nazali na esengo mingi ndenge Nkolo abimísá ngai.

Ee, nakómá koyemba uta Nkolo abimísá ngai;
Nakóma koyemba uta Nkolo abimísá ngai;
Soki Yesu te, oh, nalingaki kozala wapi?
Nazali na esengo mingi ndenge Nkolo abimísá ngai.

Bozali na esengo mpo na yango, boye te? Na bongo *Tokotambola Kati Na Pole*. Boyebi loyembo yango?

Tokotambola kati na Pole, Ezali Pole kitoko,
Eyaka epai matangá ya mawa ezali kongenga;
Engengaka zinga-zinga na biso na mói mpe na butu,
Oh, Yesu, Pole ya mokili.

Bósepelaka na yango, boye te? Tóyemba yango lisusu.

Tokotambola kati na Pole, Ezali Pole kitoko,
Eyaka epai matangá ya mawa ezali kongenga;
Engengaka zinga-zinga na biso na mói mpe na butu,
Oh, Yesu, Pole ya mokili.

Ezali kobima ya mói!

Bino nyonso basantu ya Pole bótatola,
Yesu, Pole ya mokili;
Solo mpe mawa na Nkombo na Ye,
Yesu, Pole ya . . .

Sikawa tótombola maboko wana tozali koyemba yango.

Oh, tokotambola kati na Pole oyo, Ezali mpenza Pole kitoko,
Eyaka epai matangá ya mawa ezali kongenga;
Engengaka zinga-zinga na biso na mói mpe na butu,
Yesu, Pole ya mokili.

Bópesana mbote ya loboko.

Oh, Eyaka epai matangá ya mawa ezali kongenga.

Bozali na esengo ndenge bozali bana ya Pole, boye te? Mwana asili kolamuka.

. . . zinga-zinga na biso na mói mpe na butu,

“Bana mike, bolingana kati na bino.”

Oh, tokotambola kati na Pole, Ezali mpenza kitoko . . . (Kokokisama ya Liloba na Ye.)
Eyaka epai matangá ya mawa ezali kongenga,
Engengaka zinga-zinga na biso nyonso na mói mpe na butu,
Ezali Yesu, Pole ya Liloba.

Bino nyonso bondimi yango?

Tozali kokende na Siona,
Siona ya kitoko, kitoko;
Tozali kokende na Siona,
Engumba kitoko oyo ya Nzambe.

Oh, tozali kokende na Siona,
Tika ete baoyo baboi koyemba
Baoyo bayebaki Nzambe na biso te;
Kasi bazali bana ya Mokonzi na Likoló,
Mpe kasi bazali bana ya Mokonzi ya Likoló,
Bákoka kotalisa esengo na bango,
Bákoka kotalisa esengo na bango.

Mpo tozali kokende . . . (Nkembo!)
Siona ya kitoko, kitoko;
Oh, tozali kokende na Siona,
Engumba kitoko oyo ya Nzambe.

Oh, tozali kokende na Siona,
Oh, Siona kitoko, kitoko;
Tozali kokende na Siona,
Engumba kitoko oyo ya Nzambe.

¹⁹³ Bóbimisa miswale na bino. Bózua miswale na bino, mwa moke. Tópesa Nkolo mbeka ya koningisa. Ezali liboke, kasi bazalaki kozua miswale ná biloko mosusu oyo esilaki komama nzoto ya Polo, bomoni.

Oh, tozali kokende na Siona,
Oh, Siona kitoko, kitoko;
Tozali kokende na Siona,
Engumba kitoko oyo ya Nzambe.

Oh, tozali kokende na Siona,
Oh, Siona kitoko, kitoko;
Tozali kokende na Siona,
Engumba kitoko oyo ya Nzambe.

¹⁹⁴ Amen! Oh, ezali kosala ete bómiyoka malamu, boye te? Nazali kokanisa basantu ya kala, liboso bákota na libanda ya masano ya Baroma, bazalaki komata mwa ngomba wana, boyebi, bazalaki komata na mwa esika wana, oyo ezalaki kokende kino na libulu ya bankosi, bazalaki koloba:

Oh, tozali kokende na Siona,
Siona oyo ya kitoko, kitoko;
Tozali kokende na Siona,
Engumba kitoko oyo ya Nzambe.

Bitando ya Siona epesaka
boboto ya bule nkóto,
Liboso tókóma liboso na Ngwende ya Likoló,
Liboso tókóma liboso na Ngwende ya Likoló,
To tótambola na babalabala ya wólo,

To tótambola na babalabala ya wólo.

Tozali kokende na Siona,
 Ezali Siona ya kitoko; kitoko;
 Tozali kokende na Siona,
 Engumba kitoko oyo ya Nzambe.

195 Bózongela koloba maloba na ngai:

Nkolo Nzambe, namipesi lisusu epai na Yo. Petola ngai na mabe nyonso. Petola ngai na ntembe nyonso na Liloba na Yo. Tika ete, kobanda Pásika oyo, náková ekelamu ya sika kati na Klisto Yesu. Tika ete námema, na motema na ngai, Liloba na Yo. Tika ete Ézala Mwinda na makolo na ngai, oyo ekongengisa nzela moke na ngai. Banda sikawa, nakolanda Yo. Na Nkombo na Yesu. Amen.

Tozali kokende na Siona,
 Oh, Siona kitoko, kitoko;
 Tozali kokende na Siona,
 Engumba kitoko oyo ya Nzambe.

196 Ezali kosala ete bómiyoka malamú, boye te? Tosili komipesa lisusu, toyebi ete na mitema na biso tosili kopesamela bomoi longwa na bakufi, tokómi bato na bomoi. Ezali kosala ete bómiyoka malamú, boye te? Oh! la la! la la! Nalingi bino, na bolingo oyo ekufaka te.

Boyoka. “Bólingana kati na bino. Mpamba te okoki te kozanga kolinga ndeko na yo, oyo ozali komona, mpe koloba ete olingi Nzambe, Oyo omóná te.” Bomoni? Boye, bólingana kati na bino.

Na bongo, soki bosaleli bamoko na bamosusu, bosaleli Nzambe. Ezali bongo? “Oyo bosalaka epai ya bana mike oyo bazali na Nguya oyo epesaka bomoi kati na bango, bosalaki yango nde epai na Ngai.”

“Ntango nini tomonaki Yo na bosenga? Ntango nini toyaki kotala Yo na boloko? Ntango nini tosalaki makambo yango?”

“Oyo bosalaki epai na bango, bosalaki yango nde epai na Ngai.”

197 Ezali malamú mingi, boye te? Nalingi Ye, bino mpe, boye te?

198 Oh, loyembo mosusu ezali tosengeli koyemba, soki bozali na mwa miníti mosusu. Oh, ee, tokozua yango kaka. Malamú. Malamú, misie. Oh! *Mema Nkombo Na Yesu*. Bóbosana yango te, balinga. Bisó nyonso tóyemba yango sikawa. Moko na moko, elongo sikawa, na motema moko ya monene, tóyembela Ye yango. Tóyemba yango na motema na biso mobimba.

Mema Nkombo na Yesu,
 Mwana na bolozí mpe na mawa;
 Ekopesa yo esengo mpe libondisi,
 Mema Yango bisika nyonso okokende.

Nkombo kitoko, O ya boboto!
 Elikia ya mokili mpe esengo ya Lola;
 Nkombo kitoko, O ya boboto!
 Elikia ya mokili mpe esengo ya Lola.

¹⁹⁹ Bómikanisela sikawa, bóbondela mpo na ngai ntango mipepe makasi ya minyoko ekopepa, ntango milimo mabe bakobeta món dengé ngámbo na ngámbo, nakomikanisela ete bozali kobondela mpo na ngai butu-moi, ngai mpe nakobondela mpo na bino.

Bótelema pembeni na mokengeli na bino ya malamú, Ndeko Neville, ná molandi na ye, Ndeko Capps. Bóyokela bango. Bakoteya bino malakisi ya Liloba na Bomoi. Nandimi yango. Soki ná ndimaka yango te, na ntembe te nalingaki kozala na bango awa te. Na ntembe te, nakolinga kosala yango te. Nandimi ete bandimi Nsango oyo, mpe bakokangama na yango na boyebi na bango nyonso, mpe nazali na kondima mpo na bango mibale. Bótíkala na bango. Bandede mosusu oyo bazali na mayangani na bango na bisika mosusu, baoyo batelemaki awa na mpokwa oyo, soki bozalaka pembeni na bango, bótelema pembeni na bango. Boyokaki ntina oyo bayelaki awa, na mpokwa oyo.

Mema Nkombo na Yesu,
 Lokola nguba liboso na motambo nyonso;
 (Bóyoka oyo.)
 Ntango masenginia makozinga yo,
 Loba bobele Nkombo mosantu wana na
 libondeli.
 Nkombo kitoko, (Nkombo kitoko!) O ya
 boboto! (O ya boboto!)
 Elikia ya . . .

Nzambe molingami, bikisa bato oyo na nzoto. Nabondeli Yo, Tata, na Nkombo na Yesu. Kokisa yango, Nkolo, nabondeli.

. . . O ya boboto!
 Elikia ya mokili mpe esengo ya Lola.
 Kino tokokutana! kino tokokutana!
 Kino tokokutana na makolo na Yesu;
 Kino tokokutana! kino tokokutana!
 Nzambe ázala na bino kino tokokutana lisusu.


Sikawa tógumba mitó.

[Ndeko Branham abandi koyemba na nse ya mongongo *Nzambe Ázala Na Bino—Mok.*] E Nzambe, zalá ná biso. Sunga biso, Nkolo.

. . . tokokutana na makolo na Yesu! (Kino
 tokokutana!)
 Kino tokokutana! kino tokokutana!
 Nzambe ázala na bino kino tokokutana lisusu.

²⁰⁰ Yango mpenza nde libondeli na ngai. Kino tokokutana lisusu, Nzambe ápambola bino! Sikawa nakosenga na Ndeko na biso ya motuya, Neville, soki akolinga kosilisa liyangani kitoko oyo.

Nzambe alingi bino, moko na moko. Nazongisaka matondi mingi kozala na bato lokola bino nyonso. Nsango na ngai elingaki kozala ndenge nini soki nazalaki na moto moko te oyo andimi Yango? Mpe bato bazali awa oyo bakoki kokufa mpo na Yango, mpo na Nsango oyo tozali na yango. Tika ete Nzambe ásungu bino, moko na moko. Mabondeli na ngai ézala na bino. Mapamboli na Ngai étambola na moko na moko na bino. Tika ete bóbosana te ete bozali eteni ya lisekwa wana. Nguya oyo epesaka bomoi ezali sikawa kati na bino. Nyonso esili. Ozali mwana na Nzambe.

Tógumba mitó, liboso Ndeko Neville ásilisa liyangani. Mpe Nzambe ápambola bino. 

65-0418E Nzambe Abongolaka Nde Makanisi
Na Ye Na Ntina Na Liloba Na Ye?
Branham Tabernacle
Jeffersonville, Indiana U.S.A.

LINGALA

©2025 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyikanisama te, kotiamana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, koméla:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org